

嘉興府志

ル 5
1574
29



門 九名 5
號 1674
卷 29

嘉興府志卷九十七

列傳

海鹽縣

表表

晉

李祥海鹽縣城望人少維其力知

之以義隆表中路思地海王

地地南恩賜至山然

人天之所

嘉興府知府善化許瑤光重輯

列傳

海鹽縣

孝義

晉

李祥海鹽歟城里人少雄於力知書史鄉有爭鬪悖犯折
 之以義隆安中孫恩寇海上祥從內史袁山松討賊築
 壘泥瀆恩驟至山松戰歿祥突白刃收山松尸歸葬時
 人義之名祥所居里曰教義

南史參
趙圖記

梁

陸黯海鹽民太清之亂侯景遣其將朱子仙攻沒吳郡以偽太守蘇單于守之黯舉義有眾數千人乘子仙進攻錢唐襲殺單于推前度支尚書陸襄行郡事襄遣黯及兄子映公帥眾躡子仙與戰黯敗走吳下襄一夜憂憤卒時同義者有陸緝戴文舉等景以海鹽人起義破吳因分海鹽胥浦二縣為武原郡

南史陸襄傳參梁書侯景傳海鹽圖經

宋

衛公佐字輔之事繼母以孝稱族有不能婚嫁者悉俛助之聚書數千卷禮四方賢士訓子弟時縣未有學捐地

為址又獨任禮殿之役熙甯饑疫邑人賴以救療元豐中復饑民皆負稅令滿代者已至轉運使苛留使督逋負縲繫盈庭公佐出粟代輸之弟公寬公望並敦行誼

兩浙名賢錄

聞人堯民字伯封淳熙六年赴楚州錄曹母春秋高不肖去鄉里囑其弟舜民侍養而獨之官積俸遺母為盜所竊禱于北斗神盜就擒點閱原券纔失其二人以為孝

感夷堅志

元

陸壽一宋樞密副使旋吉八世孫明經學著孝經傳二卷

隱居梅花莊方道叡薦官之不就从祖居仁卒鬻產以
佐其喪年九十餘卒曾孫宗仁由舉人爲通判歲饑賑
活二千餘戶建先祠于梅花莊置義田以贍族之困乏
者吳志

過宗一蚤喪父獨與母居張士誠陷姑蘇略地至海上宗
一負母逃與寇遇欲殺之以身蔽母中數創乃舍去傭
以給食母卒不克葬寢苦服哀語輒泣下清江文集

沈嗣昌字原懋一名壽康居豐山之陽早喪母事父竭力
孝養父亡構廬墓側匍匐以泣者六年南臺論薦官之
不就洪武初知縣王文表其稱曰孝隱趙圖記

陳寶生字彥廉父思恭娶妻生子寶乙思恭商泉州繼娶
莊氏生寶生思恭浮海死莊誓死不嫁訪寶乙在海鹽
遺錢贍之寶生既長自泉徙崑山築春草堂以奉母迎
寶乙歸事之謹寶乙死撫育其孤工詩畫與黃公望交
最善公望拉之觀濤至東城忽涕泣不與俱曰陽侯吾
父仇也公望哀之爲著仇海賦以記之海鹽圖經參
樵李詩繫

劉儼字敬先博學善詩文娶瞽婦終身相敬如賓門人蕭
孚貧卻贄且周之粟友人沈德常死鬻產葬之祀鄉賢

海鹽
縣志

明

劉鳳字景儀先世學正恂從汴寓海鹽陶涇元末舉家為賊所戕曾孫用方垂髻身受十八刀不死後生三子長卽鳳也鳳倜儻好奇略明初海甯衛官軍調往沈家門海洋防倭多遭風溺死鳳建議奏改為陸守有九里三砦之設又夏稅額少納者苦其零星改於秋糧中併輸亦自鳳始以子泰貴贈官

兩浙名賢錄

潘允濟邑捍海塘雜用土石易崩洪武三年海溢淪田畝允濟走闕下請築塘專用石上遣宋署丞如法監築邑

賴以安

海鹽圖經

崔永字彥齡七歲喪父母韓更適里人桑慎慎為御史坐

事謫海南攜韓從軍永長思母不置徒走走海南誓不見母不還行次瓊州得焉會慎歿力求歸母有司以配屬無放還例不許走京師號泣請于朝許之歸舟至江右遭風覆舟永入水負母母得活永感疾死江西省臣茹大素以聞詔賜祭葬給驛舟歸其母永往返海南無停足者四歲廣海間皆稱崔孝子

海鹽徐志參廣東通志

胡寬字景灝父繼海為社學師寬少孤博涉經史亦為社學師好說古今事勸迪鄉人鄉人化之時邑城民居稀授書止寬父子每五鼓開學堂懸一燈高竿諸童子望之為俛抱書至至今相傳為趕蚤學

王文祿衛志

夏安字世康爲人慷慨負義氣篤倫理孫瑞號西莊幼喪
父事母王孝母患痼疾醫不能療割股以愈愛遺腹弟

璠終身無間撫按旌其孝友

董穀撰傳

陸達定之子永樂時薦授博士兄弟同居數十年未嘗析

箸庭有紫荆一本數幹時人呼其里爲祥里

吳志

陸宗秀字坦菴陸正曾孫永樂初徵召不仕歲饑傾粟麥

賑濟詔旌其門曰尚義子珪字廷玉嘗代輸一邑之賦

景泰時連年饑疫珪與弟獻瑜瑾各散給穀麥凡萬餘

斛敕授迪功郎

海鹽縣志

章暉字景文嘗赴試入郡途遇鮮鯉冒雨買歸烹奉父食

然後去父或怒伏地受杖俟怒解始起後膺貢遂授鎮

江衛幕

海鹽縣志

王儀字汝儀自稱古鐵生親歿廬墓妻亡不再娶以子託

兄無私蓄嘗爲君子小人圖題詠于上以警世

海鹽縣志

陸平者世居邑西麓富甲一里洪熙改元暨正統壬戌景

泰乙亥歲大饑前後入粟五千餘石麥八百斛賑濟詔

旌爲義民表其宅宴之光祿授散官

海鹽縣志

莫藏字用行性孝母臥病三歲不起父發疽瀕死皆割股

療之博涉書史善篆隸行楷間作墨花清潤可愛所著

有佩鱗稿詠史詩素軒稿五音字書辨訛

海鹽陳志參書畫譜厲鶚

東城
雜記

王紀字宗憲由歲貢任滁州吏目嘗奏捐州之冗稅又請罷海鹽民兵海鹽人德之祀鄉賢

陸鮮字一拙十二齡補諸生尚俠倭寇犯海鹽傾家召鄉勇朝夕防禦眾藉以安郡中屢經水患鮮捨地為義塚殮瘞浮屍郡守梁材高其義勒石紀之以上
吳志

陸源字本深成化壬辰歲大饑鄰婦相率攜幼穉入廚下遂敕廚中每日多作數十人食以待來者鄰左右數十家竟日不舉火逋租佃戶入市貿易紀綱奪之責令還之曰以布易粟家中必枵腹待餐忍奪之耶有持宣公

族譜來曰海溢失譜久矣不敢妄冒
兩浙名賢錄

鄔質父性侈好客質竭力養志好馬即畜良騎每出必隨馬後子魯亦純孝甘貧落魄居父喪哀思成痞夢中無夕不侍父側醒必涕泣因號夢椿云海鹽
仇志

仇必達必顯海甯衛右所人與兄武昂季弟必侃友愛不析爨必顯嘗路遇暴屍勸必達買棺瘞之自此遂施棺及絮襖濟寒又沿塘鑿井五十以濟渴王文祿衛志參
李旻尚義記

顧昂字文顯成化中嘗為新泰典史昂家澈浦數上疏請鎮城事宜皆報可一請濬城東南地為河載土築黃家畝塘捍海一請豁澈所公佔城池軍營田地稅糧一請

以城濠空地海上新漲沙地為牧馬場毋令鎮軍縱牧踐壞民田一請免所軍運艘減馬軍舊額百匹為六十匹免遠漕及孳牧等苦至今賴之

嘉禾獻徵錄

顧薇字子芳母李歿水漿不入口者三日刻木肖像事如生母棺在堂鄰火將延及薇伏棺大慟火忽反繼母盛不善視薇事之如李卒化為慈

劉志

胡彭述字信甫幼喪父事母仇極孝每問母父貌若何居官幾年輒失聲慟哭室三楹中奉母身及妻劉居左夜寢未嘗闔右扉曰吾何忍自隔阿母耶好藏書有好古

堂書目

海鹽圖經

葉春華海甯衛軍事母至孝朝出暮返晴樵雨漁市以供母母性暴多怒酒肉稍不善必令別置而叱使跪以待食不命之起雖達旦不敢起縣令聞之旌其門

猶及編

孫浩正德時為蒲城丞倡修義塾其裔肯堂以選貢為鄱陽訓導捐俸以惠諸生纂修邑乘

吳志

陸良號仰雲父病百計求治母蔡寒月病痰思食西瓜良徧走得之疾愈後復病割股以療友愛其弟甚摯有徐覽張煥秉性純孝並以割肱愈母疾縣令皆旌之

馮臯謨傳

參袁志

朱文才字尚卿澉鎮布衣慷慨多智略嘗鬻角里壩開興

水利築文星臺於白芒漾中醵金首事人或不應必傾橐成之

胡棡字敬之潑人性純孝父性侈而嗜音棡極甘旨竭力致賓朋以奉之後家日落不能致乃自學曲娛父夜與父同寢以腋暖父足如是者十餘年父沒嚮室以葬寓

其媼徐氏以死

以上海鹽圖經

許聞至字長聖性孝友倭寇海上時從父自城歸遇賊跣足負父行數十里得免居喪哀毀骨立為弟任役事破家浙撫招見之不往沒祀鄉賢

袁志

錢蓑字懋登琦少子貢為於潛訓導長厚好行義嘗收葬

門下士何生買妾贈老友程琦生子潛諸生何龍坐獄

藜知其冤餽橐饘焉斷獄者聞而愧謝立釋之輯所見

聞為厚語行世

海鹽圖經

徐藻字子潔司訓縉子諸生痛父被倭驚病歿具奏召集鄉兵滅賊雪父冤得旨許其招募賜名忠孝軍乍浦沈莊之戰藻在行間有功不受賞而歸

嘉禾徵獻錄

董謙字德元仲真五世孫兒時父笞之跪而受責捧杖而

泣迨長定省中禮節居喪哀感行路苦廬旁木枝生連

理家有廢井甘泉湧出每哭慈烏繞舍啼與哭聲相應

宏治中詔賜天下孝子冠帶謙與焉

海鹽續圖經

吳芸字時美尚俠好義子霽善承父志霽子之英舉人為
蕭縣令歲祲煮粥濟人又設藥局療病者人頌其德祀

鄉賢

海鹽圖經
參吳志

王槐字南喬無教幼弟成立嘗著尚書闡幽居虎溪人稱

虎溪先生

海鹽續
圖經

徐淵字汝器父壽病疝甚危操藥以進鬚髮盡白嘉靖中
倭蹂內地挈家避山林中倭騰山而上眾驚悸無措一
倭忽從山麓招呼各掉臂去得免僉謂純孝所致子應
奎字星魯父病隆冬思食瓜泣禱于圃瓜纍纍臥槁葉
下食之而愈人名為孝瓜云

袁志參海
鹽圖經

祖彭年字賢卿諸生性慷慨遇事敢言嘗白罷首區坊廂

名役嘗夢人書醉字授之因號醉翁竟以酉年卒以子

重奕貴贈如官

海鹽
圖經

劉世坊字敬止次子事父母曲盡孝敬性忼慨嘗置田
三百畝以贍族戚之無依者子祖錫少孤割股以愈母

疾由選貢為江西府判數月乞侍養歸

吳志參海
鹽圖經

陳馬兒者乍浦軍也嘉靖丙午倭犯金家灣指揮方泰射
中一倭追之墜馬而傷馬兒扶泰上馬與敵鎮直前搏
戰甚力援絕馬兒走至山半自擲下足陷石窟中被殺
泰為文祭而瘞之時同戰者有倪軌倪輔李峻任凌義

一林岳並效勇而凌林二人亦戰死二倪及敖中所入
敖後死于矮婆橋之戰

海鹽圖經

鮑宣鮑惠胡士澄茅堂並以勇力聞嘉靖癸丑四月二日
倭船泊演武場海岸衛帥率兵禦之宣手抱一倭與俱
死士澄以火藥焚其船亦與酋入大王者俱燼餘倭走
矮婆橋堂追之手梟一倭與惠及敖鎮血戰良久伏發
咸死惠喪元身挺立若赴敵狀時戰死者十八人名姓
多失紀時同里有訓導孫冑堂已宦歸倭掠邑西郊突
入冑堂室執之將加刃焉僕以身蔽主請代死倭兩舍
之

海鹽圖經參
浙江通志

周至德字岸登諸生性行醇慤嘗拾遺金子道埃其人至
歸之

吳志

彭紹賢字孔嘉以世職歷參將性孝友祖業悉讓從父卒
祀鄉賢著擊壺編子宗礪痛母因產亡生辰必素服流
涕讓世爵于弟卒

袁志參
吳志

顧莫字子期父患瞽相而事之不離側撫兄之孤子有恩
舉嘉靖鄉試子槃亦舉順天鄉試天性孝友讀父書未
嘗不流涕母性嚴急稍不當意必長跪色霽乃敢起弟
早卒恤其孀

劉志參海
鹽圖經

錢與映字淵甫薇子嘉靖甲子舉人通濂洛之學自奉極

澹泊獨好義施嘗置田贍族修橋堰便行旅歲戊子大疫延茗醫凌氏施鍼灸全活者眾撫其弟端映嚴而有恩弟亦恭而退讓世並美之子陞孫潤徵瑞徵另有傳

海鹽圖經參袁志

張中孚幼師董穀習舉子業穀衰落時從步四十里問候

不已友人鍾思孟死贖金為殮晚年窘惋而歿

海鹽縣志

沈鸞者訓導孫肯堂僕也嘉靖癸酉倭掠邑西郊突入肯

堂室將加刃焉鸞以身蔽主請代倭義之兩舍

海鹽縣志

葉芳蓀字友輿句陸里人萬曆丁巳母顧疾篤刲肱投劑

知縣何公楔綽旌之曰孝念篤真

海鹽縣志

李延嗣年十六母范病篤割股療母萬曆間縣令杜士全

知府龔勉並給扁旌其廬

海鹽縣志

鄭忠材字孝標刑部履準子弟恕材以序承祧叔履洵忠

材仍以遺產均析白首友愛無間言

海鹽縣志

陸舒字平度少為諸生姿貌瓌偉慕古烈士風容即撫蔣

允儀幕府值張獻忠躡楚即列城多陷檻車徵允儀舒

感知已伏劍從諸將力戰破賊列城盡復允儀得末減

坐流戍後撫欲上其功脫身遁歸家益貧意氣激昂中

所不可王公不能致善畫蒼潤森秀得叔明大癡筆意

海鹽縣志

徐起字冲漢庠生割肱療父洪恩疾邑宰旌其門曰純孝

海鹽縣志

王衷字本誠持已嚴毅張甯與之交壽以金不受傭書積

數百金悉捐以建順甯橋子阡字汝直有巧思嘗為救

火法及築捍海塘式又製一輿加牛背乘之曰犢舟人

慕其達多有從之遊者

吳志參海鹽圖經

朱元弼字良叔諸生父用中性嚴正元弼安貧力學事繼

母竭力奉養弟不善治生乃賣已宅代償逋自寄友人

舍以居所著有士林密約敬道會編禮記通註猶及編

學者稱達隱先生

嘉禾獻徵錄

曹禎仁五世孫孝弟力田嘉靖甲辰倭寇石墩禎與弟祚

集眾擊之村里賴以保全

鄭茂靖海記略參袁記

張亨家半路亭嘉靖甲辰官兵與倭戰孟家堰死者數千

人亨斂殘齒盡瘞之又收甲仗數百上之官太守劉愨

義而旌之

沈藻字元明隆慶戊辰進士守泰州以廉潔聞忤要路歸

貧無以給教授生徒佐二人甘旨父性卞急稍不懌必

泣跪一日郡守龔勉過候藻久之不出值父怒跪不敢

起也龔知之深歎其孝以子宏遇貴贈官祀鄉賢

以上浙江

通志

賀南儒隆慶辛未進士為閩縣令以勤勞致疾卒子萬春

走數千里迎其喪歸萬歷時為鴻臚丞數月即以侍養

告歸母有警疾萬春妻趙日以舌舐之復明吳志

周紹宗字岐陽本姓馬少失恃事生母繼母如一繼母病

久體不能屈伸楚不可禁紹宗負之行盤旋室中日數

百回病遂瘳一日偶出心動急歸生母警帷中失火不

能出紹宗從烈焰中負之火頓熄浙江通志

朱正學字中甫兩中副榜不仕敬養後母事兄如父撫育

孤姪置義田以贍族貧不能葬者葬之子豫順明濂洛

之學泰禎官福建道御史祀鄉賢海鹽續圖經參吳志

王廷俊字海若萬歷甲午舉人授高郵州愛民禮賢寒賤

沐其惠居鄉樂施予修官塘濬城河賑饑置義田著有

讀易解子蘇字元治諸生早歲喪婦不復娶嘗救難婦

周急給櫬助葬著史漢通鑑纂要等書海鹽續圖經

吳大良字春庵貢生除夕有鄰行竊匿轎中天寒發顫有

聲大良蹟知之給銀米令務生理感泣而去伊志

湯秉廉字惟潔家貧耕田鬻鹽以養父母父年七十餘病

篤醫藥罔效割股療之湯立賢傳

沈宏達藻長子藻病目達以舌舐之目復明異母弟宏鍵

生三日藻歿宏達與妻陸慈護倍至嘗還金折券兩臺

郡邑並旌孝義子廷銘諸生工詩畫篆籀有靜遠堂集

海鹽圖經

錢陞字紫芝與映子萬歷戊午舉人博學好義置義田以贍族建義莊以勸學改造文昌橋至今為便著有西乘

庵稿

袁志參海鹽續圖經

徐廷泰字宙知諸生父洪錫得癘疾泣禱于神遇道人授

以方飲之病良已八歲喪母忌日祭必哭事繼母盡孝

養家貧好購書箋釋性理大學衍義陽明諸書

浙江通志

褚明祥字瑞良母王氏疽發背割左髀一臠羹以進母病起後復病割右髀和藥病又起母歿肖父母貌事之終

身孺慕張煥字堯章七齡父病目割股以療張調元天

啟舉人孝事繼母值怒跪以求歡

海鹽續圖經參吳志

鍾祖保字念之祖述字君明皆梁孫祖保性直敢言少為

諸生遇大造條列積弊數端上邑令令以破家縣令語

惕之曰生聞樂只君子民之父母而已令有慚色祖述

孝友純篤嘗割地葬宗人十餘柩祖保博學能詩晚坐

臥一樓植竹數千竿十餘年不見客

海鹽續圖經參樵李詩繫

鍾士傑字俊人父患背疽焚香禱天剡左肱得痊親族欲

為請旌力辭止之

程原洛字理源父遠任桂平畱原洛事祖祖病衣不解帶

者數十日割股和藥以進病瘳

王榜字瑞郊曾祖端籍河間正統間為海鹽令卒二子瑄璧不能歸遂居海鹽榜多厚德萬歷九年邑令核田畝之不均者舉榜督丈量吏胥不能上下其手邑人德之

以上海鹽續圖經

黃耀如字淵明父雲梯有至行讓產卹嫠宗黨稱之耀如少孤能承父志食貧砥行撫兄子如子崇禎壬午登賢書絕意進取著闡理編澹逸齋詩

海鹽續圖經

鍾鴻穎字海槎舉人為上海縣令有平寇功卒于官從弟顒字盥若童時跪吮父疽以孝聞

袁志

費仕字仰泰割股療母疾讓產于叔嘗三還遺金兩拒奔

女卒祀鄉賢

海鹽續圖經

張源思字睿衷進士少孤力學事母盡孝與兄源成弟源長友愛無間嘗伏闕陳情詔旌其母

海鹽續圖經

吳晉晝字接侯崇禎丙子舉人性孝友病中不廢溫清為文浩瀚有水流雲行之致詩學長吉書得晉人法子曰夔字汝典幼從張履祥學弱冠蔚然為儒宗從叔早卒撫其孤恩誼倍至工詩書有物表亭集

海鹽續圖經參酌浦詩話

陸源初家貧傭書後力耕致富好行其德多義施外孫王文祿嘗作古民傳志其遺事

袁志

馮裔昌字羽純天啟丁卯舉人家素封乙酉之亂奸民焚

裔昌宅掠其藏後有按院某與裔昌同年或勸鳴倡亂

者治其罪裔昌不可聞者嘆其不可及陰行錄

朱匡維字廬峯父疾謹侍湯藥不避寒暑母歿茹素哀痛

晚益好行善事著皇極義闡先儒未發之旨海鹽續圖經

李淑字仲素孝友好義歲祲首發粟賑貸貧不能葬者葬

之鰥寡不獲養者養之舉鄉飲賓袁志

朱正誼字思梅歲貢生捐產為祭田三舉鄉飲子泰復善

養親志遇事敢言海塘圯以正誼所輯歷代塘志上之

當事依議舉行民運白糧例點富戶充解率破家正誼

曾創官收官解法泰復白諸巡按御史疏聞于朝著為

令甲申三月京師陷泰復北向痛哭自刎死世稱孝節

先生海鹽圖經參朱氏家譜

劉鼎銘字叔子始祖某有功高廟時世襲百戶正統間調

守澈浦所遂世居澈明末國事大壞鼎銘擬戰守策數

十條欲走京師上陳而明已亡聞信痛哭狂走乙酉八

月竟死于城外其弟鼎鍾鼎銓皆死海鹽圖經

周行字子行立品孤介能詩畫家貧恥干謁為吳貞肅所

重盤桓京邸見時不可為以歸隱諷不從迨貞肅殉難

與祝孝廉淵親為含殮經營旅櫬間關南歸晚年僑居

吳門臨卒告其友曰必葬吾於要離冢旁

海鹽續圖經

吳麟世父中倬甲申殉節死麟世遇忌日必流涕事嫠母

曲盡孝養有澹園詩草一卷

張大成字殿倫世居逍恬刲肱療父母病得瘥

吳鳳來字鳴岐溇浦人海寇竊發父為盜所得鳳來號泣

徧訪有告以所在候寇盡出負父逃歸兵疑其通盜下

父子獄鳳來奔救哭訴卒免于難

以上伊志

蔣正開字端伯庠生天性孝友嘗割股療母病歲稔輒蠲

粟賑濟百家遐年久傾圯捐資修築平生讀書談道宋

儒理學暨諸子百家律歷方技靡不綜貫兩舉鄉飲大

賓子志

湯承憲字懲予博洽多聞療母疾嘗割股親戚故舊急難

相援片言解紛不居德色均田均役兩舉並上議佐其

成

趙士俊字望之萬歷間隨父其孝兩次簽北運白糧初以

米虧揭京債繼懲前累多備米官反呵其科斂故浮於

數父抗辨觸官怒捶交下士俊時甫束髮忽抱父指臂

幾折暈絕不放官乃動容稱孝子始得免

子志

曹觀字鑒長至性孝友事父母每膳必親視烹調親疾廢

寢食居喪哀毀三年如一日兄弟之間自相師友怡怡

如也與人交久而能敬人有急每周恤之無倦色于志

王元仁字靜安性孝友父有六子元仁居長貧俱未娶父

臨終囑仁以撫育婚配仁受命勤苦蓄積次第為諸弟

畢婚已年逾五十竟不娶後以弟子世崧承祧云于志

嚴鉉字履三庠生事父母寢食省視必躬母衰邁艱於步

履出入扶持勿辭勞瘁遇親疾輒顛天求代親歿哀毀

成疾不半載卒于志

黃廷贊字右丞少孤家貧母張氏年二十七守節廷贊事

之惟謹凡盥櫛匕箸以及厠踰必身自供澣母年九十

餘廷贊亦老且白首出入起居廷贊必親自扶持每呼

即至笑樂如嬰兒遠近皆稱黃孝子于志

錢志高字洪溪父疾篤祈身代割肱進奉嗣叔後房產悉

以讓弟歲饑出米賑救不取官價舉鄉飲賓于志

崔天貺字白芝性孝友析箸時父以長子襲世職憐其幼

而欲微厚之天貺固請均分偶市其產得數少遂焚故

券不欲畱此啟釁也于志

沈鳳翹字瑞華稟資端重至性孝友弟鳳翥早夭畱遺腹

子翹撫之如子兄鳳翹早亡姪年俱幼翹以養以教使

之成立舉鄉飲賓于志

許麟字悅仁幼年隨父赴試父為耿逆逃兵所虜麟牽衣

號泣哭聲振塔汎兵聞而救之父患瘧痢侍奉湯藥躬

自洗滌又嘗割肱以療母疾著學庸解及錄生集并梓

喪宜五禁及雜誠以箴世

于志

蔡廉母嘗怒持杖撻之廉曰母止待兒伏遂伏地受杖杖

已徐起拜曰母弗怒累母矣

于志

蘇瑞字鳳臺幼孤事母至孝母患瞽瑞禱於神母目得明

享年九十有四

于志

陳士澄字鑑公讀書通大義父母沒以遺產讓弟獨任喪

葬弟有癩疾為勢家所誘至訟兄於官終憐弟病不介

意後弟貧收養之終其身

于志

徐埏字瀛表父遠出音問不通者二十年埏尋親抵江南

荆州而病默禱于神願減已算祈與父遇病愈入蜀謁

卞方伯始知父客廣西旋抵廣西始遇父遂迎父偕歸

而徐孝子之名以震

于志

王廷傑字海澄由貢為兩淮鹽分使疏陳鹽法切中利弊

居家喜為善族黨無力葬娶者捐金以助子大任貢生

著雲漢堂集

鄭煒字若父祖滌父維楨皆諸生煒端方不苟取子嘗以

忠孝廉恥訓及門老舉賓筵孫宣亮相繼登甲乙科人

以為世德之報時先後舉飲賓者有崔玉崔鑑周幾周

諫采沈廷鑑玉為賦長遇歉歲必散粟以賑鄉黨遠近
 橋梁前後修建七十有二所鑑好吟咏善持公道與人
 甚和厚義有不可必嚴以析之幾與諫采兄弟也皆好
 讀書樂施子設藥局以濟人疾病死而無歸者殯之兄
 弟終身未嘗分爨廷鑑醅謹恬退與物無競事親孝兄
 弟敦睦無間言歲凶鬻田賑饑當道給額旌之
 馬吉詹道張卿皆彭太僕期生僕太僕殉難章江三人俱
 不屈自刎死

沈年澈浦吳氏僕乙酉兵破澈浦其母死于兵年終身蔬
 食言及輒泣下

海鹽續圖經

國朝

盛旦字幾臣世居嘉興新豐鄉父泰交布衣倜儻生七子
 各授一經旦居長才名冠諸弟弱冠居父喪哀毀骨立
 奉母沈備極色養友愛諸弟教孤甥徐全卒成名士明
 末大盜四起旦倡率兄弟宗人為防禦盜至指揮佃丁
 健兒與格鬪椎沈其舟盜之得脫者無幾相戒不敢犯
 弟九鼎先雋旦以甲午舉浙榜出譚希閔之門希閔知
 湖州坐罣累伏法旦經紀其喪送歸里人咸義之授東
 陽教諭未赴丁母憂起補蕭山教諭倡修學宮郡邑檄
 脩邑志以蕭嵯二邑志屬旦書未成以勞致病卒門人

私謚曰文恭先生

海鹽縣志

錢萬實字鶴洲六齡喪父哀慕如成人母楊病輒籲天請代母卒享大年明季辛巳壬午游饑萬實罄家貲鬻器物資粥以賑全活者多一孺子奉母命持布易米失布啼於路萬實貸米與之并助友人羅某殮其母陰德甚夥後二子之燾紹隆俱成進士享年八十有六受給諫

封

海鹽縣志

費萬程字雲其幼失怙依母自立母疾篤刲肱以進得復甦順治辛卯登賢書壬辰會試中副貢初秉鐸剡城補任澱水甲寅春陞國子博士衡文校課大司成沈荃深

器重之

海鹽縣志

查大焜字伯符事父母孝性抗直遇有不平身為排解與人交無城府窮疾無告者多方周卹之

浙江通志

徐乾貞字御六貢生昌治子乾貞弟蒙貞早卒羣推乾貞子承祧先是蒙貞有妾生子育于外人鮮知者乾貞訶得之亟招之歸

吳志

黃觀祖字冲寰孝友篤行隱德自腴築萬竹樓於管葛山順治間舉賓筵童松門私謚為安白先生

海鹽縣志

朱舜字佩芳諸生與姪汝珩纂先儒精義成傳心錄四卷子鼎元國學生母瞽舐之復明喪偶不再娶輯傳心錄

續編 海鹽續圖

蔡維祺七歲喪母號慟如成人事繼母金尤謹父病亟割

肱授劑 表志

王尚志庠生事母祝盡色養創建宗祠周卹親族 海鹽縣志

趙至德字心如士俊子生有至性晨夕不離父母年十六

父疾危甚割肱以進病亦旋愈子廷玖年十三父亡顛

仆號慟如成人

朱哀字砥中諸生幼失怙母疾露禱請代居喪哀毀置祭

田以贍族歲乙卯飢民載道兩臺下令助賑哀首出貲

以應己未秋旱捐穀倡賑卒祀鄉賢哀友貢生徐彪曾

與衮及顧爾澄同修明啟禎實錄彪為人端方事親盡

孝彪孫挺萬里尋親孝德尤著云 以上海鹽續圖經

許全泰原名翰字周翰弱冠為諸生棄去隱居村落好義

忼慨無倦色尤善事後母 吳志

徐有麟好施濟明季早荒捨米賑貧順治七年歲又大饑

買米散給舉鄉飲賓 于志

崔玉潔字在郊孝子永之裔父歿事母盡孝創宗祠置祭

田撫兄弟遺孤咸使成立 吳志

俞京相字君調嘗緣弟累破家後更周卹之三間寨塘崩

率先捐貲採石修築遇善事施濟無倦色 伊志

陳武毅字佃兮遇善事慷慨必為撫從兄遺孤捐金置外祖沈墓田助鄰里婚喪無力者歲荒早出粟捐金賑濟邑令彙詳請旌力辭止之

劉維棟字伯隆泫子諸生事親孝謹鼎革時散家廩數百石捐金贖難民之被掠者邑有利弊有司咸諮其條畫

云以上海鹽續圖經

徐宗穉字孝若邑諸生明季庚寅辛巳歲大禳旱蝗斗米百錢力請當事減價平糶躬為士大夫倡傾困不惜康熙庚戌辛亥歲又荒捐濟亦如之

于志

朱稷字或賓母錢有賢行病久醫不能療或賓刃股進竟

不起

楊園間見錄

徐豫貞字德宣天性孝友家門雍睦晚年肆力於詩文著有滄浮子詩集逃庵稿諸書

王之曾字懷曾世居沈蕩讀書以明倫為重性忼慨好施濟舉鄉飲大賓

顧惟贇號質文州同知少英敏喜讀書敦倫睦族里黨稱之

徐儲元字翰飛選貢生廷試授通判讀書樂道以孝友律身著有詩集子始亨字東崖以選貢為遂安訓導課士有法遇貧生尤竭力周之

張源長字德孺少孤事母孝處兄弟間終身友愛有姊早

寡迎養數十年敬禮不衰以上吳志

彭孫繩字子羽長宜子工詩與從兄孫貽友人童社輩倡

和乙酉避兵豐山扶母沈潛匿復出求父遂遇害著有

問業居詩文集

周士彬字宗雅性好義一日自杭歸見婦人攜二孩泣于

途問之百戶某眷屬因陣亡流落士彬招之歸盡具服

用送還里後貧甚子孟昭仲昭傭力奉彬三十餘年無

倦色

平章字天衢鼎革之際道多餓莩捐貲收殮深埋于山麓

老鶴荷子望字茂功里有開荒墩者將棄骨殖于水望

亦為收掩之

周維垣字斯璜世居海昌祖守道以弟宗彝殉國難遷于

海鹽維垣兄弟四人誼學相向母錢病篤醫藥罔效維

垣割肱以進病旋瘳

郭介字蓉皋母病割肱和藥以進

徐硯榮辟喪父事母養志弱冠婦亡以已有子不復娶

支如璧字玉泉天性孝友分產悉讓于弟撫育族子無依

者捐貲修學宮直指杜果舉賢良下檄旌獎以上海鹽續圖經

錢福徵字厚庵篤實敦行庶妹適于方夫死無子家貧養

之終身遣嫁其孤女每出必攜良藥濟人鄉鄰貧乏者

歲周之於親戚故舊尤加意焉楊園見聞錄

劉燾字容大幼孤事母克盡色養獨力營先世葬捐助祭

田族中逋賦每代償之雍正甲辰秋海溢負母據高阜

他無所顧于志

錢綸光字廉江瑞徵子性至孝工文詞家貧藉脩脯以養

瑞徵官西安教諭綸光歲一省視著寒江歸棹詩慕思

淒惋動人以子陳羣貴贈如其官吳志

鄭應生字時可父母喪哀痛踰禮伯兄貧而早世奉養嫠

嫂數十年無間代償亡友積逋累百金卒祀鄉賢吳志

王汝諧諸生以役事與里書張某熟張女殊色已許字張

借官僕銀以女為抵僕利其色不往索逾三年計子母

應若干金張不能償欲奪女為妾汝諧適過其門見張

夫婦相持哭詢其故汝諧計子母悉代為償信徵錄

朱廷采字子鮑諸生父歿慟哭幾絕負土成墳廬墓三年

家貧奉母甘旨無缺母沒復廬墓三年乾隆元年奉

旌建坊崇祀

陸士清字兼山年十二補諸生性孝友勇於為義康熙二

十年大造糧冊分別民官徭役不均士清首白當事正

之舉已酉鄉試以父母年高絕意仕進教授終於家

沈廷鏞字爾振諸生孝友嗜學礪名節重然諾遇困窮者

竭力以濟著有文章宗範以上海鹽續圖經

朱銓字衡三康熙辛卯舉人以母年少苦節垂七十年不

忍遠離遂絕意進取于志

李國泰字凝之少不事生產所遺負郭田百畝悉分給諸

弟與同里陸子國童百旃稱莫逆交嘗抵郡聞哭聲問

之知累官事將賣妻以償出橐金贈之有何大賢者家

僅中人而性仁厚有貧鬻身于人者遇主母嚴酷將離

異其夫婦為捐金贖身使之完聚康熙四十三年旱大

賢年逾七十力率子弟捐金雇工濬諸溝渠以資灌溉

海鹽續圖經

張學賢字漢侯性至孝嘗禱神願減已算療親疾果瘳咸

徵孝感康熙六十年學使馬豫給額旌之子穹選字仕

雲增廣生醕謹孝友有父風待庶母弟三人友愛甚篤

業師朱某亡家屬無依穹選以舌耕贍養終身又憫里

人沈某病瘋欲賣其妻倡義日給米薪夫婦賴以完聚

海鹽縣志

畢國瑞字宸表幼失怙事母至孝奉寡嫂盡禮由成均考

授翰林院孔目康熙己亥制府檄修澈城條陳利弊公

私稱便邑吏苛索窬戶運磚壁費無以應將鬻女償國

瑞設法潛禁仍不令窬戶覺初環澈城孺多樹桑將悉芟夷備馳道國瑞以蠶桑民命所關脫有急需馳道旦晚可辦耳奈何無故先絕窮民衣食之源乎力阻事得寢他如築捍海土塘修學廨捐賑施棺諸利益事皆踴躍為助人服其義

海鹽縣志

楊荃字卓伊居父母喪哀毀骨立三年不食鹽酪事其兄

兆蘭如父事無鉅細必諮問而後行

浙江通志

方開基字德肇歛人隨父商于浙遂家澈浦母死廬墓三年後病篤其子震旭割肱以療世稱父子純孝

吳時敏字昆怡性至孝母郁病篤醫藥罔效割肱以進得瘳踰年又病復割肱幾絕

沈德臨字湘瀾入太學母病百藥無效割肱投劑病遂愈

越三載母又病篤仍以既割之肱復割餘肉和藥以進

子曾樟亦以孝聞

葉有聲字向生澈人母患危疾有聲割肱進之母卒號踊

不輟終身蔬食以羸病卒

海鹽縣志

何澄字滄洲庠生父梯早歿事母盡孝晚年築舍墓旁講

學著書郡縣聞其名三舉鄉飲崇祀鄉賢子全字原萬

庠生應聘修一統志著理學薪傳集

海鹽縣志

朱王泰字寅瞻諸生兩世未葬獨割己產葬之嚴茂才五

世同居敦彩雲敦朴好善五世一堂以上海鹽續圖經

朱允昌隱居樂善子本諸生事親盡孝族黨貧者其婚喪皆身任之

俞嗣榮字位思諸生壯年喪耦不娶置義田以贍族著有自鏡錄

陳堯勳字怡生倜儻有大節好施與敦族誼以醇謹稱以上吳志

郁檐家貧訓蒙以養母有吳姓逋糧將鬻女檐以穀代納女得免海鹽續圖經

賀偉觀字毅如性孝友剛直凡遇地方利弊不憚慷慨直陳辛丑年編審里役條列十二首議均田均丁邑中利

賴康熙元年星使巡歷沿海偉觀獨詳畫疆界鹽邑得免播遷于志

朱宏謨字奕範康熙戊子舉人公車至淮上夜聞鄰人哭甚哀詢之因失官物欲自縊謨傾囊中金贈之扁舟返

里終不復出于志顧錫純字繡于幼穎悟性嗜讀書弱冠補弟子員度量豁

如常以濟人爲念康熙四十六年夏大旱河涸獨捐資開西門河使北水得以南流初無德色至其衰老憐貧

憫孤恤寡未可枚舉于志

許雄字熊飛事親先意承志家貧甘旨無缺母病籲天求代母歿哀毀骨立廬墓三年雍正十二年具題奉 旌

浙江通志

李商玉潯浦人篤行純孝父母死于兵貧遺骸不得繪圖

作邱墓以志深痛歲時懸以泣祭刻苦積金捐修潯城

從郭達郊以便行者里人名之曰報恩街

海鹽續圖經參吳晞淵傳

劉瑞陽秦駐山人嘗拾遺金坐俟酒肆中久不至因囑酒

家而去明日其人號泣來詢之乃鬻女以償租逋者亟

歸之陰行錄

陳廷倫字維翰給諫所學元孫母患疾醫藥勿效割股肉

以奉疾痊後母卒倫以哀毀亡

張國臣隊長也守沈蕩康熙十三年寒山賊劫沈蕩鎮先

一日賊遺國臣書啗以利令弗出擊國臣徧告居民嚴

備器械以待明晨賊舟蟻集國臣率汎兵張敬山馬百

勝張子雲等奮勇格鬪手刃數賊力盡被殺汎卒三人

亦同死里人陳世琦為立祠于里社廟西以祀之

姜悅周常川壩人父母疾輒廢寢食奉湯藥嘗就典吏于

官署念母辭職歸官憐其孝給百行首全額旗之

打答陳某巫也父早世事母至孝為人迎神必攜酒肉供

母而與妻子食糗草遇朔望則衣冠而拜陸大生負販

人也其父衣食不給逐之于外業販鹽隨所得供父風雨寒暑無間又有胡憲令字曙光者父病醫藥罔效禱天割肱既而母病危篤再割肱以進皆得瘳

黃正氣字浩生慕范文正義田欲立未果子金蘭孫謙升泰先後置田一百六十畝成先志云

朱維新字康侯諸生性鯁直澈城舊設新河中壩蓄濠水灌田萬畝有豪民給縣令開壩決水濠涸田盡荒維新偕畢蕃昌吳孝貽訟于官數年事得直始奉檄如舊制彭孫適紀其事後人設主祀于壩之普濟庵

潘稷字尺衡孝廉兆新子勇于爲義邑無育嬰堂稷號召創率毀其家成之甲辰潮溢邑人偕紳耆集議防海策稷奔走風塵中凡六十日以勞卒

徐志榮字士升從子士瑤幼孤族有欲毀其家者志榮力爲卵翼家得完士瑤樂善好施族里貧不能舉火者給以錢米暑月造蚊帳死無棺者予之棺他如新關帝祠買石螿築沈蕩煤矢堰皆可紀者

徐信卿蘆青里人有王某售屋于張將拆矣王闔室大慟信卿適往見惻然止之割腴田八畝償張直王得安居尤奇計字濟公邑城朝聖橋圯獨力重建又有歸望山者重建通元西潭橋其妻擔酒食工匠風雨不輟同時有

王公升與兄賓宰助貲建沈蕩橋橋成名曰永慶

以上海鹽

續圖

黃鈔字宗彝庠生歲除入城拾金珠約值百金即於途次

默坐以俟旋有人倉皇至問所失言悉符遂還之康熙

二十年事

于志

俞承吾少負膂力尚氣節父母死貧不能營葬其外兄吳

子九助之承吾感吳德思報吳會某與吳有隙潛持鐵

椎欲殺吳承吾知之挺身赴鬪傷脅死吳為立祠置祭

田祀之

郁秉樞俞義士傳

顧錫綸字晉三貢生性至孝好義樂善歲饑請折漕以裕

民食潮溢議築斷塘新堤以固土塘至今賴之

李璜字鴻舒諸生嘗捐金贖孤女修清風大麻涇等橋著

有小窗偶錄佳聞手編多長者言王厚坤字載宏諸生

嘗出貲收葬遺骸著有蚓吟集

朱淑大字羽青太學生遇儉歲煮粥賑饑施棺掩骼不令

人知卒祀鄉賢

以上海鹽續圖經

殷紹遠字義庵慷慨好施康熙三十二年早紹遠親之當

事捐貲濬河溉田千餘

吳志

阮朝棟字佩韓諸生事所後父母孝養倍至工詩文著有

秀野堂集

海鹽續圖經

吳龍輔字楚材諸生少孤貧兄病授徒養母具甘旨與妻

食粗糲兄卒養寡嫂及遺孤三人生平不欺閭室時以

孝弟勉學者嘗與從兄玉成倡議興復孫家堰水利一

方賴之著有函齋集玉成字功懋諸生

激浦詩話

吳有榆字蒼培儀洛子至性懇摯事父不違年逾六十依

依如孩提幼失母諱日必流涕著有居易居詩文集

伊志

宋悅高農人也父彩奇母徐病垂死醫者術窮悅高跪哭

乞藥醫者曰汝之肝腸誠欲救母我則何能悅高誤解

即往先墓哭禱畢舉刀剖胸割取肝暈絕有頃甦創口

自閉解纏股斜幅裹胸歸以肝煮湯進母沈疴旋起悅

高臥創旬餘而愈家人不知也後偕鄰人屏水有見其

癡痕者詰之始知其故鄰以聞于縣申其事上官給烏

哺天真額揭之閭

張庚記宋孝子事

鄭澐字觀瀾曉七世孫家貧業賈有杭商攜千金授澐囑

積絲未買而商已病歸三年不至澐攜原金至杭訪之

則商已先卒妻子不知有授金事澐出千金還之封識

如故

伊志

周建中農人事親至孝母寢疾割股煎湯以進疾得痊父

母歿寢苦出者一年既葬每日必省其墓母素畏雷遇

雷雨必披蓑立于墓側

伊志

朱尚儉澉浦南湖人天性仁孝父病疫醫藥罔效割股煮藥以進父嗜西瓜尚儉求瓜種佳者種以奉之及父卒耘瓜而泣是年瓜瓢盡白如雪而味更甘美呼為朱家

雪瓢瓜伊志

蔣功巍字夔哉善射後術活人頗多盛夏施藥濟鄉里有董某者傭其家既聘而貧不能娶母家欲別嫁其女以白金索庚帖功巍令還其金復與金治具以全其婚以

子泰來貴贈官伊志

黃海山者天性至孝母袁病篤率兄弟五人日夜籲天請代自割肱奉母既而父君瑞病亦割肱以療

徐德瑜字不瑕增生事母馬孝每日必親自供奉甘旨畢備集古今嘉言行為一編曰含真錄伊志

蕭世絃字東昂太學生少讀義田記心慕之乾隆壬午倡同志捐修瓠城橋築官塘數十丈倡修尚胥橋朝聖橋及孟家堰橋結老人會按月散給錢米以贍窮乏伊志

徐文錦字魯元性好施子捐貲助建瓠城橋捐田助育嬰堂親族貧者周結不懈晚捐田三百餘畝請于當事創設蔚文書院邑令旌之伊志

任永治字邦懷尚義好施置義田義塾資族之讀書乏膏火者歲稔出粟賑濟舉鄉飲賓曾元繞膝五世一堂年

九十二卒

伊志

馮德徵字紹京性慷慨好施予白苳橋垵德徵召匠計之需費四百金獨任之其尚義樂善類如此

伊志

康萬春諸生三歲喪父事節母張盡孝母疾篤祝天割股作糜進飲之疾旋瘳

伊志

何原彪字廷光生四歲母徐死鞠于繼母賀極盡孝養置祖墓祀田修合族宗譜凡建橋梁修學宮諸善舉皆率先捐輸為紳耆倡

伊志

張元熠字漢濱厚重能文無子有住屋二區水田百餘畝盡捐入觀成書院以資貧士膏火士林義之

伊志

湯允熾業賈不求多積惟以娛親為樂鄰室火力負其親以出他無所顧父歿每遇雷雨必著屐持蓋往省墓歷數十年如一日

于志

李士錡字景韓太學生少失怙獨居殯所者三年遭母喪亦如之撫幼弟友愛倍至他如建宗祠置義田歲饑出粟賑濟鄉黨至今猶稱之性喜書畫著有書畫記

于志

沈蘭字香國性端謹家貧下帷攻苦未嘗干人以私早喪偶弟蓮亦早賦悼亡兄弟二人風雨連床友愛之情久而愈篤

于志

陳連鰲字柱滄性孝遇人急雖窘迫必彌縫濟之家人化

其行雍睦無間言志

任廷楷字樹芳性孝鄰室火母危不能出廷楷冒火進負母走燼木突下傷足仆地赴救者急從背解母時廷楷已暈絕牢不釋手因共抱扶至一樹下良久始甦股已

糜爛志

馬緒字鑒操太學生父早卒事母色養兼至及母沒營墓

廬旬日間必一再往省依依如孺子慕著有抱樸居詩

稿採入兩浙輶軒續錄志

朱世標諸生性孝友少孤母老病侍湯藥每夜必起寒暑

無間居喪痛絕復甦志

張默字聲雷諸生事親以孝聞母病顛天願以身代及母

沒哀毀成疾不數月亦卒志

陳石英字子敬乾隆戊申舉人性孝友工詩古文兼通字

學韻學算學志

陸用浩字玉泉邑庠生性孝友品端方母病用浩患疽甚

劇力疾侍湯藥晝夜不倦兄弟雍睦無間言晚年失明

祭掃必親往與後生言必以孝弟為最著有玉泉詩錄

志

吳蓀伯字右箴父宦粵命畱侍大母曲盡誠敬年四十二

遭父喪哀慕如孺子水漿不入口七日遂卒於苫次志

朱宗城字翼君嘉慶辛酉舉人居喪哀毀備至遂致疾及病篤深以窀穸未營為已罪遺命以素服殮著有沁園

詩草

于志

李應占字南人敦孝友尚志節嘉慶二十四年

詔旌孝行道光元年舉孝廉方正詩詞書畫俱翫然拔俗著有

小方壺仙館詩鈔

于志

陳基昌字訥庵嘉慶戊午舉人敦孝友事繼母極謹扶植諸弟未嘗以異母岐視之

于志

朱星煒貢生侍親疾衣不解帶居喪水漿不入口者七日

道光元年以孝行

旌于志

祝汝成字道閑性孝友宗族及戚友中有貧不能葬者輒

毅然任其事

于志

朱昇字應亨與堂弟城友愛最篤後城病故昇遠館他處聞訃奔歸大慟致疾越十四日亦卒

于志

朱昌佐字衡府諸生性孝友敦品立行每勸宗族公置祭產為敦本計

于志

胡若琴字南珍性孝友母嬰痼疾敬養罔懈晚年出已產以贍諸生年八十六卒

于志

俞肇榮字九峯性孝友父病刲肱以進弟早亡膳寡教孤極敦手足誼

于志

何廷樑字宏道性誠厚里黨有貧困者輒調恤之事親尤

孝嘗築杉阿館以娛親志嘉慶九年舉鄉飲賓于志

俞廷銛字玉墀事親極孝有族兄老而失子時周之且為

葬其上下六喪于志

馬國偉字愚庵性孝友與弟用俊晨夕聯吟庭有常棣連

枝之瑞一時名公鉅卿咸贈以詩著有愚庵詩稿于志

朱以權字生廷貢生事親孝父病篤封肱以進獲痊于志

吳元棟字良材家貧父久客不歸母日夜憂疑遂辭母往

尋負木版鐫年貌于上所經過處輒以印本貼之冀有

指示者後至楓涇知已葬武廟後遂措金付守廟人使

護其塚痛哭招魂以歸于志

吳端邑庠生父病劇醫罔效封肱以進于志

馮振揚至性過人父某沒於山西振揚行乞尋骸骨歸葬

壽八十餘卒于志

任鋒彭福壽姚士楷皆家貧至孝嘗封肱療親疾閭里稱

之于志

朱埏之素性孝友父歿每哭嘔血升餘母患肺疾痰嗽不

能出口輒以舌運之與弟方增友愛甚篤數十年如一

日于志

黃振玉字健君事繼母以孝稱負笈他鄉聞母病徒步歸

侍湯藥晝夜不倦哀毀骨立旬餘亦卒易簀之日猶諳諳以孝友勉諸弟于志

黃仙根字亞圩乾隆庚子副貢績學多才尤好施濟郡邑修學宮葺書院以及濬湟掩骼諸善舉無不預晚年設

義祭等田刊刻規約斟酌盡善著有銀花藤館詩集于志

祝乾錫字磊人諸生性慈惠親族有告貸者周之不責券

硯田所欠悉以分給匱乏于志

姚玉墀字崑圃乾隆丙午舉人官天台教諭精岐黃術貧不能藥者徒步往診兼助之劑即參苓所弗惜于志

陶維善字芾堂敦本好義廣施藥材以濟疾苦恤痿恤寒

諸善舉皆出貲以贊成之于志

郁文彬字廷相慕義樂施歲饑竭力蠲賑橋廟有傾圮者

輒出資修之戚友借貸臨終悉焚其券于志

趙乾行樂善好施捐山五畝以為義塚遇荒歉出粟平糶

舉鄉飲賓五世同堂壽至九十一歲子周彪光裕並有

父風于志

馮鳳威字如三貢生處事明決嘗值秋霖不止颶風迅發

海水漫溢力請當事修築防禦時或疫癘流行必延醫

製藥徧施貧乏弟承佺字南三諸生甲辰海盜陳創修

之策有餘姚民流入鹽邑者給口分得還死者施樽櫝

以殮人高其義于志

張國正字南州少孤貧以不得事親故茹素終身一日黎明於途中拾遺金二十兩徘徊不去俟其人至悉與之

無德色舉鄉飲賓于志

吳本佳字典簧嘉慶庚申舉人讀書明大義歲祲倡議蠲

濟活人無算于志

徐紹鎬附貢生敦族誼凡族中墳墓糧賦其子孫無力完

納者悉與弟紹京代輸之或以緩急告必量為周恤無

吝色于志

盧元熙字鑑清樂善好施嘗出資開濬澈河支浜九百餘

丈鋪澈城北門外石道遠近賴之于志

張治字鈞衡樂善好施道光元年

詔旌義行于志

朱承陞字香海貢生董修學校勸捐施賑閭里重焉于志

張晉字錫蕃性倜儻勇於為善好施不責報有士某以非

罪論死力營救之後將幣謝拒弗納于志

朱用堪字崑嶺樂施予每倡義醵金以濟族之不克婚葬

者于志

楊與圻字五生諸生好收藏圖書法物遇人急難傾囊拯

濟勿少吝歲祲有欲遷棺槨以鬻地者償其值而存之

于志

顧友忠字會海通翁後裔周急濟困樂善不倦于志

陸廷冠字遇川家僅小康樂善好施求之無弗應家遂中

落後舉鄉飲賓于志

趙養浩字廣元善岐黃術招之輒赴不計酬謝事寡嫂如

母撫孤姪如子臨卒以自置已產均分與姪里中咸稱

之于志

張學會字庠郊諸生敦本尚義創立義田文亦有奇氣于志

錢同文字養真精岐黃術遇危篤疾投劑立愈貧者不能

具葠附每出筒中蓄入咬咀不以告有荷擔販鹽者家

無斗粟鹽為捕所奪嘔血數升匍匐求治同文潛以白

金雜藥中啟函得金以為誤也持還之同文曰吾安得

有金即遺汝必明告矣其人得金飲藥立愈其陰行善

多類此壽七十餘乃終于志

曹恒直字誠夫親喪後忌日必閉閤泣慕雖年七十未許

子弟稱觴延師竹圃嚴課諸子雖除夕不廢竹圃忽長

新籜枝長丈餘因號曰瑞筠有妹適許寡挈其孤教如

已子即明經琦也子辰容另有傳海鹽縣志

康二老樸實如村農設酒肆於市數十年無疾言忤色母

生時常畏雷母歿每雷聲作無論晝夜必冒雨詣墓雨

壽乃歸不遺一次年八十餘健步如少壯人蕉窗間話

楊德保兄弟三人德居幼洒掃使令不辭勞苦羣稱之為

呆德保父耄年目痛漸失明德保日夕舐之淚淋漓不

為穢不半年日復明蕉窗間話

劉祖錫字子福少孤事母項孝割股愈母疾游南雍執經

焦竑之門有志用世考究朝野典故謁選光祿寺丞遷

江右府判乞養歸依棲丙舍以孺慕終其身海鹽縣志補纂明人

畢璿字舜元府庠生母病危篤親滌溺器割股愈母疾丁

內艱哀毀盡禮海鹽縣志

孫漢章住邑西鞞鼓為業母王氏病痢割股煎湯孝感卽

愈壽至八十一而終海鹽縣志

朱爾鄴字子長泰禎子純孝篤行舉明經當泰禎按滇雷

家侍大父母備極色養捐祭田建祠墓葺梁施榘善舉

甚多歲乙巳舉賓筵生平曾入水不濡者三厚德之徵

也所著有曲臺約旨葦讀齋初問海鹽縣志

楊清字既陶甫離襁褓母吳見背事後母朱曲盡禮儀失

怙哀毀補弟子員學使者谷應泰薦舉稱曰門內無間

言公庭能杜跡洵推貞養君子海鹽縣志

周幾字逸如太學生與弟文學諫采字仁如共敦友愛不

分爨每延醫設局濟人病遇屍無歸厝者與以地因此

家益貧廣授生徒講學于郡城東修散給幾獨郡守王師夔聞而高之與交最善詣鹽時信宿其家顏其堂曰

最樂兄弟皆為飲賓

海鹽縣志

葛叟農人也性誠實鄰居歛商囊千金歸雇叟操舟囑令善藏之路遇流兵攫其餘金驅商登岸而使叟駛至吳門旋得脫歸悉以藏金還商商感酬金不受時人義之

徐滄浮為作表義行詩

海鹽縣志

朱澐字价維邑諸生至性過人幼聞祖父言甲申死事諸臣事忽墮淚失聲人以此奇之及長孝友端方濟貧急難念兩從父貧分業贍之尤邃心程朱子書所著有性

理管見小學便蒙若干卷

海鹽縣志

王維綱字振庵庠生性孝友父會字蓋思游庠早逝易簣時以父老不能逮養為恨維綱事祖鶴齡與母以孝聞

撫弟養寡妹人無間言

海鹽縣志

祝晟字野先嘗拾遺金訪還故主往游南山道旁拾珠帽默坐以俟果有老嫗泣覓問之實係抱幼主失去者還之即於是年得子人謂為善之報

海鹽縣志

蔣樹臣幼孤無室兄嫂不能事母傭工獨養侍奉必謀甘旨因父歿于凶年終身不茹葷

海鹽縣志

許以德字拱辰先世籍海昌以德贅于東塘陳霖山家霖

山歿囑撫二孤送死養生訓孤成立拓故業而歸之

海鹽

縣志

陳其經字叔倫幼失怙善事母張母病嘗刲股以進

海鹽縣志

朱台光字鴻章父患手足痿台光左右扶持躬進飲食捧

溺器朝夕不離十餘年如一日

海鹽縣志

陳德林父客死江西德林年十六走千里尋骨歸葬里人

為繪負骸圖

海鹽縣志

李恒安小墅里人父病篤醫謂飲人血或可挽回恒安焚

香祝天斷指瀝血以進父病稍愈

海鹽縣志

吾元圻字硯尹邑庠生沈文節殉難凶耗至遺孤髻鬣謀

收骸骨咸憚遠行元圻毅然自任偕文節舊僕袁咸跋

涉數千里訪悉遺骨藏梧州荒寺得負以歸趙衡銓書

元圻粵中紀行詩後云慷慨敦交道收骸萬里還烽烟

羣盜路瘴癘百蠻天俠骨超千古忠魂鑒九泉奚囊餘

好句贏得共流傳

海鹽縣志

朱九一字少儒庠生咸豐辛酉縣城破九一從容作絕命

詞五首題學壁有不須更作身家計此後妻孥任自謀

之句繫頸闌干將自盡被賊解脫仍斷食死

海鹽縣志

沈掌大澈浦人辛酉二月賊陷縣城旋築壘璵城鎮按戶

搜括民憤甚掌大倡義號召聚眾萬餘並乞澈浦汎官

兵為前鋒五月十三日把總陳長瑞率眾前進行抵勾
塍橋遇賊船開礮擊其魁餘賊鳧水逸俄賊援至戕長
瑞赴激大掠並索起義諸人掌大謂吾不出必累眾從
容就執過酒肆飲神色自若抵塢城賊究問黨與掌大
曰倡義惟我何多問為遂被害年六十一歲助掌大鳴
鑼集眾者有庠生張鏡坊保郁老五事敗張鏡自縊郁
老五亦被害

海鹽縣志

朱嘉玉字子信毓文子國學生沈掌大義兵潰後時海甯
屯重兵嘉玉乞師不應痛哭歸十二月賊陷澈城虜其
兄嘉幹暨兄嘉穀子福詵福潛玉以幹多病追之願以

身代賊釋嘉幹脅玉及福詵福潛行至浦東會官兵攻
之急賊夜遁福詵福潛乘間得脫嘉玉性倔强卒被戕

參縣志

顧桂餘農人咸豐辛酉冬賊犯澈浦隨父走避倉猝相失

疑父陷賊中突圍視之賊脅行遂赴水死

海鹽縣志

王乾元字確庵監生年已耄匪擾居鄉誓不蓄髮同治二
年冬海甯賊猝至髮短被執乾元罵賊不屈身被數創

死

海鹽縣志

[Faint bleed-through text from the reverse side of the page]

文苑

宋

魯之茂字伯秀號雪村祖可簡有蘭亭會妙卷之成跋其
尾稱兒時侍先祖龍舒府君坐膝上觀此今已七十年
不覺感愴云之茂善畫梅竹甯宗朝仕為郎蘭亭續考
參畫史會
要

魯應龍字子謙宋末布衣著閒窗括異志足副藝苑談資

海鹽圖經參
樵李詩繫

元

沈穀字仲實開朗好讀書後至元間官餘干同知樂郊
私語

明

唐貞字士幹為東莞丞時從楊鐵崖講學韓履祥贈士幹

詩有宦遊踰嶺海聲價動京華之句海鹽圖經

朱孟德字維新寓籍陝西甯夏衛中永樂戊戌進士任廣

東興寧知縣有題出獵圖寄西溪李季衡詩橋李詩繫

陸贊字德潤宣德間以詩文名兼善篆隸為人嚴毅莊重

以禮法自持嘗病世俗湮于佛老而喪不成禮著居喪

撮要鄉人私謚貞一時有楊復生字繼先亦工詩居尚

胥里橋李詩繫參海鹽圖經

陸德裕字孟含宣德丙午舉人通周禮以經學教授著有

禮翼四卷

陸鯤字斯溟諸生家貧好購異書入其室繞榻皆書人稱

董敏齋先生以上吳志

張翥字九皋教二子寬甯皆仕於朝與鄉老給社賦詩有

香山洛下之風時有丁鉅字公銳號靜庵張綱字用常

號巢居張宏字景容沈甯字致遠號煤泉見武原集又

劉玘字公纘有西林集滕鸞字儀朝有翠厓集橋李詩繫參靜

志居詩話

陳善字敬佐為詩古文詞立就不屬草求之者非其人雖

重幣不作天順間以貢為崇陽訓導年餘即歸高臥不

出孫詢工詩畫聞於時海鹽圖經 參吳志

崔端字惟正世襲指揮使器識不羣嘗從都督徐恭征鄧

葉二寇擒其渠魁精騎射兼工詩翰樵李詩繫

劉傑字季俊通律呂書數長于詩文成化改元徵修英宗

實錄嘗合族屬為同春會以合本宗子孫遵行勿失弟

常字世經諸生嘗輯海鹽邑詩曰武原集海鹽圖經參 嘉禾徵獻錄

樵李詩繫

董穀字碩甫澧子由舉人為漢陽令所至廉靜不苟告歸

四壁蕭然惟攜書自怡當晝炊烟未舉吟咏自若後遊

王陽明之門著性論一篇其悟後筆也著有參龍四存

前後集澧水志浙江通志

王洪字宗範陽明入室弟子陽明子正億從洪受書倪高

發字武霄以居敬窮理教學者選泰順訓導不赴吳志 參海

鹽續 圖經

徐晟字公允博學與朱祚齊名參政王衡按部至聞其名

延為上客著有左氏摘事燕石存稿

祖晟字廷昭性至孝能詩出語秀拔嘉靖中以貢為宿州

學正歸杜門三十年卒有東歸稿

張嘉秀字文英嘉靖己丑進士饒州教授擢南邢部郎謫

知霸州未艾懸車六齡能詩雲間錢鶴灘遊海上器重

之挾遊錢塘登張都閩山亭援筆賦長歌立就有神童

之目

海鹽縣志

湯紹祖字公孟善為駢麗之文訂定續文選三十二卷行

世讀書恐為人溷嘗置一舫聚書其中泊于寂寞處讀

之薄暮鼓棹歸以為常著有清遠堂集

以上嘉禾徵獻錄

賀簡字朝重苦志篤學手一編不釋舉賢書授恩平令卒

袁志

徐定夫字士安詩以風骨勝有次韻王文祿見懷之作為

名流所賞著蛩吟集

海鹽圖經參靜志居詩話

劉銳字蕃之以世曹襲海甯衛指揮泣事嚴毅人莫敢犯

學問淹洽與瀛洲諸老賡和有春臺集

構李詩繫參靜志居詩話

錢端暎字叟父諸生言行端謹事兄與暎極恭嘗應鄉試

發策非所問題詩省舍而出同邑姚士舜序其集作儒

隱先生傳

嘉禾徵獻錄參吳志

王文祿字世廉父佐諸生喜聲樂精騎射文祿少舉鄉薦

廉峻不以私干人遇不平叱罵不避權貴性嗜書遇有

異書輒傾囊購之得必手校縹緗萬軸貯一樓俄失火

大呼曰但力救書者賞他不必也著有藝草邱陵學山

邑文獻志

浙江通志參嘉禾徵獻錄

彭暉字日華嘉靖初為河南學諭家貧力學工詩古文辭

弟暄亦以博學聞教授邑中遊其門者多良士袁志

采九德字常吉由選貢為教授嘉靖倭變時著東寇紀略

二卷子士英字茂含讀書有志節著海甯衛乘十卷嘉禾

徵獻錄

劉世教字少彝伉爽不屑屑谿刻自苦於書無所不窺慕

義急人難萬歷壬子舉北闈選授聞清令事悉治辦病

卒世教詩極秀出文仿六朝兼工行草尺牘有集十二

卷浙江通志

沈祐字天用居海甯硤石山號紫石山人官王府典膳家

有園亭之勝工詩好交遊與孫一元僧明秀賡倡有滄

朴園稿橋李詩繫

陳楫字濟之號來山嘉隆間文學工詩見皇明詩統橋李詩繫

李璋字政虹以明經終閉戶著書著嗜泉詩存二卷海甯州志

沃饒字文裕幼孤事母孝堅志苦學應貢授華容司訓尙

書劉東山謂人曰此真庠師也海鹽圖經

吳宗漢字守忠好學不倦著有逸心道人吟稿海鹽圖經參橋李詩繫

繫

呂元善字季可以監生歷山東藩司理問嘗修東省通志

更創聖門一志自四氏七十二子漢唐宋諸儒宗系祠

祀林墓無不考據明確後以襄賑勞劇卒海鹽圖經

張奇齡字符九萬歷癸卯舉人時年未及冠十上公車不第開講席于西湖茗雪間學者稱太白先生嘗訓及門曰與為廣經術不若為真詞章與為廣理學不若為真訓詁著有鐵庵存笥集識大編問業紀事諸書以子為

赤貴贈官祀鄉賢 浙江通志

劉學顏字少愚諸生邑中浚新河正學宮門徙泮池築文

星臺皆學顏建議馮皋謨記其事 海鹽續圖經

陳許廷字靈茂陳際秦楊廷樞張溥皆與定交以薦授兵部司務歸博物洽聞尤悉掌故嘗辨杜遵道亳州檄文明祖不奉小明王馬洽木弒本雅失理非阿台所弒足

訂通紀諸書之訛所著有蘇庵集周易注傳演林左傳典略漢書雋洪永紀事本末李義山詩箋兄昌期字孟起弱冠補諸生嗜左屈班馬之文才思煥發有不可一世之槩嘗作快賦以自適其志惜蚤卒兄昌慙另有傳

浙江通志參海鹽續圖經

姚士焄字叔祥與胡震亨同學以奧博相尚蒐羅秦漢以來遺文撰祕冊彙函跋尾各為考據具有原委馮夢禎為南祭酒較刻南北諸史多出其手有集四卷呂兆禧字錫侯年十二能文章買書萬餘卷與士焄緝誦矻矻丙夜不休早卒著筆記一卷 海鹽續圖經參新纂

鍾夏字時叔以太學生授貴溪丞未三月歸嘗客白下名

士畢集咏虞美人花一時避席有劍津集橋李詩繫

崔嘉祥字道徵孝友力學六經子史皆手自抄寫垂老不

倦談經濟甚晰有雜著一卷載萬歷初年時事評議可

採海鹽圖經

朱載黃字穀修清修力學與物無競晚棄諸生村居不出

吳志

彭宗因字季親諸生後棄去與高僧者宿結社賦詩有寤

歌室稿同時有徐穎字渭友諸生初逃於禪後入茅山

為道士出遊燕趙間好談兵以姚榮靖徐鴻容自許兵

後不知所終有位州集劉兌字西成布衣亦工詩有秣

廬稿靜志居詩話參橋李詩繫

曹名卿字肖泉諸生八歲即能詩陳詹事見其文歎曰神

施鬼設間見層出不謂孟郊而後有斯異才膺貢為鴻

臚寺丞著有蟬餘集吳志

楊盛春字涇泓力學尤精音律天啟三年邑令樊公維城

祀先師廟用樂設六佾舞延與同事黃鍾十二律考訂

無差于志

陳昌慙字仲脩給事所學次子由諸生入國學與董思白

馮開之齊名天啟辛酉中南省副貢充首恩例得入仕

版昌慙卒不就為園城東曰樊圃構湧月臺俯眺大海

日與故人登覽觴詠慷慨好義故友沈貧不能葬為營

窀穸遇歉歲首倡捐貲賑濟周急孤寡無依年六十四

卒所著環玉山房集康熙四十一年入祀鄉賢海鹽縣志

錢千秋字真長天啟辛酉舉人博學工文詞自負不可一

世以牽連被逮知縣樊維城重其才力為解脫甲申被

辟為歸德府推官監軍河上棄官歸著有青崖集海鹽續圖

經參靜志
居詩話

朱學章字穉韜諸生崇禎間草萬言書將上之會陳啟新

以上書授給事中所言為士類笑遂不上甲申賊陷京

師遯跡以卒里黨私謚節隱先生袁志參復社姓氏錄

胡夏客字宣子震亨子諸生博綜古今凡七略九流無不

瀏覽好模周籀秦篆雖竹書漆簡刑散廬彝一見輒辨

其年月著有谷水集橋李詩繫

徐濟貞字涓棫諸生從治子為文雄奇自喜與弟復貞字

瑄朗有二難之稱著澹安自娛集霞蔚軒詩稿嘗集海

鹽先輩詩曰海谷遺風集海鹽續圖經參橋李詩繫

何園客字閻仙諸生父所蘊母胡同夕夢短而髯者以五

色繭投懷旦而生子因名著梅花詩百咏紀甯草燕舞

堂集徐仲選字華海太學生有鶴友詩稿海鹽續圖經參橋李詩繫

顧文輝字射墟崇禎癸酉舉人負奇不屑屑章句嘗取古今理亂及名臣言行采輯成一家言有負官租者將鬻其妻為代償其厚德如此

徐永平字子奇為文疎宕有奇氣天啟末崔魏造點將錄

竄永平名幾及禍以上海鹽續圖經

李麟友字振公儻曷不羈父殉難後棄舉子業絕意仕途與同里王介人周青士沈山子諸人日相倡和其詩慷慨奔放不屑翦裁字句每一篇出交口傳誦有布衣存

稿于

陸廷鴻字羽儀博聞多識晚歲偕李天植彭孫貽諸人逐

蹟著書以終吳志

國朝

金英字劔耿篤學力行順治初年甄拔恩貢授東陽學博

後陞感恩縣令告歸家徒四壁仍設教自安僻處鹽之

茶園里常與吳蕃昌彭孫通朱嘉徵童申祉范驥講學

海昌稱鄉祭酒者十餘年有從吾亭詩文集海鹽縣志

徐昌治字觀周由恩貢生考授通判不就兄從治被圍於

萊匹馬走山東乞師列狀訴督師劉宇烈撓怯必誤封

疆宇烈卒被逮萊城獲全就試南省登癸酉榜以父老

不上公車著有四書旨周易旨通鑑燦昭代芳摹海鹽縣志

何其仁字元長莊敬好學四子五經自為纂釋書宗顏魯公兼善寫蘭由貢生知崖州力行善政歸田不入城中

祀鄉賢 海鹽續圖經

錢采字介亭副貢讀書以涵養性情變化氣質為法築小樓於壺溪顏曰清心楹帖書平生所學為何事後世有人知此心手纂濂洛關閩之言參互考訂名性理提綱朱觀賓字道庵善史才撰及闕編詳載勝國遺事簡嚴得中順治己丑以巡按趙公薦充貢纂脩明史詩文磊落有奇氣與胡震亨吳蕃昌彭孫貽諸人結社倡和著有秋蛩音竹隱江淮紀遊等集 海鹽縣志

馬維駟字空凡貢生歷任衢州教授所至修學宮立學則

士風一變著惜餘軒集詮易緒言等刻 海鹽續圖經

童申祉字百旃博綜典故詩文數千言立就以明經授臨

安教諭所著百一編二百餘卷與彭孫貽合纂志稿若

干卷 吳志參海鹽圖經

錢爾復字仍始明太常寺卿錢薇四世孫諸生以足病不應鄉試力學通羣籍為文雄才健思有獨立霞表之概性孝友竭力事親晚年築小圃顏曰半完學者稱半完

先生 海鹽續圖經

徐棖字虞風花潢里人諸生從陳梓游得聞楊園遺風志

行脩飭子皆諸生確守遺訓所著有四書集說楊園年譜附錄諸書新纂

朱景肅字子于以選貢任常山學博未幾歸里尚義好施歲饑流民徧野景肅倡捐米百餘石賑濟他邑皆被饑民盜劫海鹽獨無恙平日攜琴書自娛既老猶勤著作

無虛日有詩文集吳志參海鹽續圖經

鄭亮字雪堂康熙丙辰進士善詩文著有文集祀鄉賢

顧宏字藥庵整飭不苟訾笑由歲貢授太平教諭以嚴毅化諸弟子累遷崖州知州

朱正標字介子諸生性誠樸言動必準禮法家無儋石介

然自持以上吳志

王槐字卜臣貢生能詩文著嘉樹堂詩集朱彝尊曰芝亭書癖與余同讀嘉樹集正如秋水明霞澄泓鮮潔知陶洗之功至矣

張尹諧字古匏貢生任太平訓導遭耿逆之變閩兵蹂躪尹諧棄官歸日以著書自娛有嶺南平泉等集

祝壽祊與弟翼芳皆諸生兄弟自相師友翼芳著憤樂詩稿壽祊著吐鳳樓詩文集

徐景穆字臣颺庚午舉人長於詩著蓬廬詩柘塘游稿等集曹宏勳字君選少孤篤志不苟徇俗著澹庵集自率

居詩稿吳麟德字元聞諸生著有纓蕙集

馮昌臨字與肩由歲貢授桐廬學官居鄉好施與倡捐修

文廟建文星閣著易學參說日省編以上海鹽續圖經

錢鴻字羽可築室宋湖好行陰德有撫松居集吳磨士字

宏度世居澈川匿影湖上頽然窮老有吾本蓮峯老布衣與世不合長掩扉之句著有斲冰集

陳光緯字緯度諸生許庭子少為張西銘所知上巳流觴

與王處卿聯席摘論史漢數則王遂以女字之女亦能

賦光緯讀書敏異天官地理靡不究心尤精壬乙之學其詩名調鍾集同時徐啟芳字梅生有竹塢集沈姓字

天生有瘦山草

徐拔慧字子開從治孫諸生有師嚴堂遺稿徐晨全字孝

績著三禮考一百卷刈園稿六十卷

張之楚字幼青貢生幼即工詩吳梅村贈句云愛君詩似

謝宣城有埽雁齋集

胡申之字令修副貢以病目廢性嗜書先世遺稿刊布不

遺餘力有復庵心在錄以上橋李詩繫

吳麟祥字稚先有吟住詩稿從弟麟趾字綠巢有學稼軒

稿從姪坤釜字季雄有安雅堂集麟祥嘗與弟麟瑞及

余鵬舉適園詩社鵬有浴鶴亭樂志園等集同時有朱

憲字常伯諸生工詩畫有鹿巖集朱絲字以陶有雪芽詩稿

吳為龍字汝納博綜羣籍尤好讀史人以史事問無不洞悉元本康熙戊午當事欲薦舉鴻博力辭不赴著諸史拾遺再續澉水志樹萱軒詩文集子朝銓字同衡入成均考授同知詩宗香山劔南有已晚亭詩集二十八卷從子正心字心存以舉人授常州同知有蘭友集以上澉浦

詩話

朱鼎鉉字楚琛貢生家貧力學嘗從師走千里著農巖詩集雜著若干卷以子佩蓮貴贈官

陳訃字言揚歲貢生初任甯海訓導遷溫州教授課士有法刻宋十五家詩杜詩自訂詩集勾股述勾股引蒙諸書及海塘議歸田增置祭產以贍族之貧乏者以子世倬貴贈如其官

吳晞淵字元復工詩文不屑舉子業體究濂洛諸書造詣深粹兼涉醫術著續名醫類案從弟景哲字孔與博覽多著作有韻類經緯二百卷

祝尹臣字景和舉人潛心經學周易性理尤研究入微著屏山心錄董上容字呂音以舉人授諸暨教諭廣置學舍集諸生講誦嘗作良知辨與姚江異旨

彭浩曾字慎齋敦行不怠學使王蘭生保舉賢良方正力辭之從游者有經師人師之目

顧夢輔字紫垣貢生淹博古今著五經異同等書顧元碩字仲若諸生薦賢良方正不赴

蔡觀光字子瞻諸生工詩能文章著一翠軒巢雲閣等稿姚生華字元升鍵戶讀書手纂五經講意春秋史傳若干卷

周勉字中嶽諸生見古書輒購得之儲藏甚富有求志堂集毅庵筆記

蕭奇中字對一諸生乙酉鼎革邑多草竊奇中與周參戎力保全城著蕭瀟集魅喜篇北游諸草八葉堂詩餘及大梁文集

王大任字古愚貢生著雪溪堂集聽水齋稿子臣林諸生同父補輯伯祖廷俊所輯易解行世以上海鹽續圖經

畢宏述字既明能詩精篆隸得古人筆意王吏部澍極爲推重著有六書通念園詩草海鹽續圖經參再續澉水志

朱光启字青巖以學問重于時遇佳山水流連詠歌不忍去著懿戒堂詩選

周福柱改名國祚字白民往來南北所至搜剔名勝輒記以詩著淡水軒詩集

楊鼎字鼎臣諸生邑乘自胡孝轅後彭羿仁童百旃續之

至康熙十一年止鼎復益以十年胡志至續圖經六十

年中典章人物半取給焉

以上海鹽續圖經

石廷猷字襄綸康熙壬辰歲貢性耿介不苟取予後受人

侮積不平愬諸邑令李鍵見其名狀歎曰是邑所稱積

學篤行石某者遣吏止其對簿而懲侮者令詣門謝過

廷猷樂訓迪後進未嘗計其脩脯以故成就者甚眾

海鹽

縣志

郁運復字言三康熙癸巳舉人嘗作檇李郡賦數萬言錢

鎬字澗迴諸生少負雋才尤長于詩著廢莪山房詩集

朱毓牲字素安諸生有石筍山房集

王濤字子雲諸生肆力于詩著薇水亭詩稿陳疏字綸扉

諸生自訂詩為三宜軒集鄭勤字翼亥諸生詩文不入

俗尚著翼慶堂集

許得受字漢杓諸生學有根柢著纔是編詩豈匏文集豈

匏雜著朱宏棧字琢庵貢生寒暑讀書一室積稿盈架

著有史辨蕩塘詩存夜雨對牀集富禧字凝齋少遊成

均著蜚英樓集

顧元芳字庸求諸生著有秋晚齋草一經亭集

以上海鹽續圖經

顧民珩字楚玉賦性馴雅遇顯耀聲援不樂顧晚年手纂

尚書通解醫方綱目等集志

吳遠字宏道諸生詩文爾雅兼工書法有見滄詩集吳毓

璞字冠嶽諸生深于經術各有纂錄知府袁國梓聘修

府志舉鄉飲不赴姚德音字靜遠諸生纂續圖經訪求

山川形勢最為祥晰海鹽續圖經

陳世倌字士常康熙癸巳舉人藏書萬卷丹黃殆遍得善

本必手錄一過著種書田稿一卷又輯杜詩注經說纂

錄若干卷伊志

吳儀洛字遵程諸生力學砥行私淑張履祥嘗歷遊楚粵

燕趙徵文考獻不遺餘力畱四明讀范氏藏書所寓日

者輒能暗寫中年欲以良醫濟世博覽岐黃家言遂精

其術所著成方切用傷寒分經闡明仲景發西昌喻氏

所未發采入四庫全書又著春秋傳義周易註本草從

新等書伊志

沈炎文字載廬雍正己酉舉人年十二六經三史皆成誦

著耕煙詩稿片雲詞伊志

吳元音字律安貢生少從盛遠學詩後棄去一意講求實

學精研先儒經傳老而彌篤顏其齋曰求放居喪不延

道與學者言必以躬行為主著四書辨四十卷學使

雷鏞為之序子自成諸生著拙存集經義若干卷兆漁

堂文集二卷從子始泰貢生著書畫考古今名賢傳伊志

張雲鶴字紫田一字抱山性高尚不慕榮仕不娶出入以

琴自隨心有所得輒鼓之兼工書畫尤邃於詩著抱山

詩鈔四卷邑令舒瞻為序而梓以行世伊志

許球字鳴虞雍正癸卯舉人事親以孝聞與弟琮友善論

文必軌於理授徒於文廟後楹數十年執經者不遠千

里而來尤精研宋儒書所丹黃本學者奉為準的于志

戴廷錦字桐庵貢生精研左傳戴記剖晰疑義數千條弟

子高醅字漢舒貢生皆得其傳醅著有南唐書補註伊志

崔京錄號拙存落拓好義有鬻女以償官逋者惻然以已

產抵其逋力學不遇著蒙齋詩稿雜錄等書子學淇學

泗友愛相師友皆舉于鄉學泗卒學淇撫遺孤應樞教

養倍至晚年一意著作有古文六卷詩八卷讀易偶得

三卷伊志

鄭柄衡字參三副貢著筠亭詩文存彭廷楷字象書諸生

幼孤母劉教育成立以教授養母盡孝著晴江小草伊志

朱崧字高村諸生落拓不治生產雖晨炊不舉而嘯歌自

若有江峯詩文集伊志

董德潤字慎知張謬字廷一皆績學攻苦老於場屋德潤

於乾隆癸卯

嘉興府志 卷五十一
賜舉人諤于巳酉

詔賜舉人庚戌會試

恩給檢討銜年八十七卒

伊志

吳正樂字夔典乾隆戊午舉人博通古今嘗分纂續圖經

徵文考獻與有力焉

于志

吾定保字爰立早歲能詩長遊成均殫心杜韓諸家探源

別流自出機杼晚年格律逾精有築巖詩鈔以孫祖望

貴贈官

伊志

朱權字仲謀少遊成均負不羈才精篆刻音律之學尤工

詩族人灑亭標榭相頡頏沒後刻有三朱子詩三人俱

篤學孝友爲里黨推重灑亭名謨烈雍正癸卯舉人標

榭名丕基乾隆丁卯舉人

伊志

錢元昆字少伯貢生工詩文篆隸著適廬詩稿張載華字

佩兼貢生藏書數萬卷遇一善本必手自鈔錄刻有初

白庵詩評

伊志

陳璵字少典庠生梁繼孫少有志行能詩文慷慨仗義戚

友有不能婚喪者咸賴以成禮代親某完欽贖數百金

捐產出其罪家貧而詩愈工

海鹽縣志

顧元碩字仲若少與兄元聞等皆有名士類稱顧氏三元

薊遼巡撫陳祖苞奏薦賢良方正可任知縣被徵不應

海鹽縣志

朱琰字桐川乾隆丙戌進士家貧為母負米百里外以歲貢應京兆試聯捷需次歸里覃精藝苑鑒別金石繚素授直隸阜平令為政廉慎及卒旅櫬蕭然著有笠亭詩

集伊志

夏鑾字槐雲乾隆癸酉選貢嘉禾八子詩鑾居其一有磊軒詩存時同學陸以謙字太冲長詩古文著太冲集

李常吉字桐江以進士知湖北麗川貴州天柱兩縣稱廉明後以事落職游幕粵西負米養母著傳巖詩文集

伊志

陳樽字組行進士歷任博白縣居官十餘年卒貧幾不能

歸櫬著有酌翁詩稿

蔣泰來字天麟進士授吏部考功司主事少貧困勵志績

學通籍後遭母喪與季弟廬墓三年著有寅谷詩稿

朱鴻緒字學閩以進士授台州府教授課士勤而有法多

所成就以疾歸著小滄洲集金臺集鴛湖集章安集諸

稿伊志

吾祖望字渭徵乾隆戊戌進士歷官戶部郎中精九章算法為戶曹倚重尋罷歸著春秋繁露註方言考略捫蝨

軒詩文集

陳濤字秀巖耽吟詠任西隆州同知時上官過境仍事推

鼓矢迎返因罷官有問渠詩草

海鹽縣志

朱丕基字標榭乾隆丁卯舉人博通經學嘗纂三禮解能

以經注經與修邑志辨吳越分界東江故道皆有根據

性和介公車至京有託上書達官者下第仍以原函南

歸詩宗三唐有標榭詩鈔

海鹽縣志

吳熙字太冲乾隆丁酉舉人少失怙恃事繼母至孝勤於

朱汲古以作者自命著有春星草堂詩稿

伊志

張燕昌字文魚以優貢薦孝廉方正天性肫摯力學好古

凡秦漢以來金石搜羅甚富著有金石契若干卷

于志

陸鼎金字耳堂學極淵博乾隆丁酉領鄉薦著有易學續

蓋繼當湖陸奎勳陸堂易學之後云

于志

吳東發字侃叔歲貢生與兄以敬潛心經學尤邃於尚書

兼通金石文字凡商周秦漢之文靡弗考究所著有羣

經字考讀書筆記書序鏡尚書後案質疑經韻六書述

石鼓文讀商周文拾遺鐘鼎款識釋文尊道堂詩文集

于志

李鳳藻字學擢附貢生其先世名璋者著有嗜泉詩存二

卷附錄一卷舊刻已佚鳳藻為重刊之并輯和章及小

傳墓誌銘附於後得採入

欽定四庫全書著有有舟遺稿

于志

孫映煜字黼齋歲貢生肆力於詩古文詞著作甚富晚年

編輯舊稿得若干卷邑令張宗軾為之序以行世于志

朱光暄字蓉湖由歲貢官於潛訓導多方訓練不數年而

士風丕變著有真珠船四卷健初詩橐六卷復惠堂橐

二卷于志

陳熙字靖之副貢淡於詩學著有春臺詩存四卷于志

胡光龍字雲川乾隆丁酉舉人工詩文好書畫兼通天文

地理之學尤精音律阮相國視學浙中時以學官春秋

釋奠宜用古樂延光龍考訂焉于志

朱景杭字羹梅貢生朱佩蓮侍講總纂

幸浙盛典名下士參考校者四十九人景杭與焉于志

任宗延字秋湄乾隆己亥舉人力學散行官甯海訓導課

諸生文行並勗尤喜表彰潛德屢膺卓薦不赴著有授

經草堂詩文稿于志

陸以誠字和仲乾隆丁酉拔貢與兄以謙齊名官新昌學

博著有毛詩草木鳥獸本旨十三卷廣李西涯擬古樂

府二卷讀水經註詩詠史小樂府和仲詩集于志

吾點字子與戶部郎中祖望子乾隆甲寅舉人嘉慶辛酉

大挑知縣改授開化訓導課士績學兼鐸十年藏書萬

餘卷皆手自丹黃所註杜樊川詩文集考訂極精晚築

舍於泊櫓山西絕跡城市人罕識其面

海鹽縣志

賀光祚字小雅少孤力學肆力於經史之學年十六領順

天鄉薦報罷歸遠近爭負笈從之著有小雅文鈔

于志

李聿求字五峯諸生少好學不事章句閉戶研經親歿布

衣終身著夏小正註後漢書儒林傳補桑志等書行世

于志

張宗棻字敬貽以副貢授瑞安教諭歷官粵東徐聞縣知

縣以經術文飾吏治著有南垞文稿弟宗松字楚良國

子生孝友力學刻李璧王荆公詩註行世宗櫛字詠川

宗柟字汝棟皆國子生性喜藏書工文翰兄弟相師友

宗櫛著詞林紀事二十二卷宗柟彙刻漁洋詩話十卷

伊志

朱篆字人龍舉人授松陽訓導遷太平家故貧以抗直罷

歸日與諸生方士高唱和有澹遠堂集士高字翼庭有

竹村集士高弟士奇字諤庭有桐溪集同里陳元城字

景陽舉人有錦江集嘗客秦淮賦焦烈婦詩為時所稱

吳連稔字兩潤幼病棄舉子業善植桑著栽桑訣一卷工

詩有棟園集陳阿寶字石壑自幼習賈後從連稔學詩

出其上弱冠卒里人為刻石壑詩草行世

以上激浦詩話

徐蘭佩號香畹諸生少即工詩晚歲困頓潦倒不廢吟咏

而詩益精著水陽詩鈔伊志

許師謙一名應潮字蠡階諸生豪爽負氣節博通經史文

筆浩瀚詩法選體著有揖青樓稿伊志

周一鳴字翼昌貢生好搜集前代鄉先生著述手自繕寫

凡二十五卷題曰鹽邑藝林又著圖經參考初二編勿

齋詩文集六卷伊志

朱廷珪字孟彝邑諸生篤於天性薄利祿晚年結社賦詩

唱和無虛日所著有藥亭吟藁其詩疏朗如其人于志

張脩羽字羽皇諸生英敏力學與從兄給諫惟赤文章意

氣相得益彰著有最舊廬詩集于志

朱殿颺字雲師貢生性孝能文尤善於詩有斯覺堂集于志

顧閔字視莊庠生力學嗜古尤耽吟詠晚著看雲草堂詩

藁子萱幼穎異年十七卒有貽堂詩藁一卷于志

陳學英字東藩諸生文思敏贍書法古宕遒勁直追二王

所著有易經闡微禮經全編于志

吳晉字黃玉庠生天性耿介資秉聰穎家貧力學工詩古

文尤精書法一時碑文匾額皆出其手于志

鄭穀字雲占嗜學工詩所著有四書解尚書集說史論綱

鑑標題策要歷朝世系考并詩稿于志

張大齡字如岡性孝友為人淳厚質樸喜讀書擅詩古文

有西園詩稿八卷懷真自言四卷杜詩選註十卷又旁

通岐黃術著醫學辨偽十卷于志

沈讓徵字不爭府庠生以廣文終著有天游居稿香霞館

文集于志

俞嘉猷字襄成小勤學嗜吟咏晚歲闢城西小圃灌花栽

竹與二三逸老拈韻賦詩無虛日自號怡園老人以齒

德飲於鄉著有鷺庵鷗池諸什于志

黃運亨字品咸乾隆己亥副貢任永康教諭讀書日數行

下天文地理諸子百家無不考究啟迪後學諳諳不倦

著有麟趾堂集于志

陳石麟字寶摩乾隆癸卯舉人官山陰教諭敦品力學課

士循循有法引疾歸惟閉戶課子弟著有小信天巢詩

鈔十八卷文集四卷于志

朱筠字達叔歲貢生博極羣書凡天文地理星命之學無

不洞悉微奧兼通勾股晚又究心岐黃治疾輒效于志

李泉字秋水應乾隆五十一年

南巡召試由拔貢官昌化教諭分纂昌邑志歸里後杜門著書

不以片牘干當事著有稽古緒餘十卷廉讓居詩文鈔

于志

祝懋昭字可大諸生博覽經史工詩著有花溪詩鈔于志

朱瑞椿字春山乾隆癸丑進士授霞浦令改嚴州教授博

學能文尤工古今體詩朝鮮使臣金履度見其楊花詩

四首謂突過前人名作手錄攜去著有春山詩存四卷

行世弟瑞榕乾隆乙卯舉人官江山訓導亦工詩著有

倚雲軒詩鈔于志

吳應和字子安敦行力學善詩古文詞並精音韻之學所

選何大復菁華錄及浙西六家詩鈔評論精當著有榕

園詞韻榕園吟稿及文鈔于志

吳修字子文善詩文精賞鑒所刻有江海連珠青霞館帖

國朝名人尺牘所著有尺牘小傳廿四卷論畫絕句百首思

亭近稿湖山吟嘯集居易小草吉祥居稿于志

周蘭枝字萊峯嘉慶戊午舉人工詩文授徒雲間從游者

皆知名士著有杏花春雨樓詩稿萊峯駢體文于志

陳人藩字繡公拔貢生品行端方尤明心性之學慨呂氏

謂心性是禪學嘗力辨之以紫陽正說駁呂氏偏僻著

援朱正呂一書于志

徐養惠字愛僑貢生耄而好學家貧訓徒自給遊其門者

輒獲雋以去著有四書參解輯有文選逸珠于志

曹維岳字魚山嘉慶辛酉舉人品學兼優官泰順教諭與

修常州郡志著有積石山房詩稿于志

畢星海字崑圃宏述孫歲貢生善屬文兼工篆隸著有六

書通撫遺于志

馮鈞字赤葵歲貢生工吟咏善書畫著有秦溪賁湖吳趨

諸詩稿于志

董喆熊字渭漁歲貢生邃于史書論列古今得失洞澈源

流嘗仿漢魏體著樂府三百首于志

陳敬祉嘉慶癸酉舉人由謄錄議敘知縣幼穎悟工詩古

文詞尤究心經史之學凡歷朝地輿沿革官制異同均

能歷歷言之瞭如指掌未及補官而卒于志

郁景清字晴川嘉慶癸酉舉人家貧好學引掖後進尤敦

古道時稱忠厚長者于志

鄭伯壘字雲颿嘉慶丙子舉人官鎮海教諭以詩文名著

有北遊寒糴甬東諸詩稿于志

高亮功字汝欽歲貢生少以詩古文自負後專究經史之

學博綜宏覽折衷至當有五經問答曉村詩詞諸稿于志

陳履亨字春萼嘉慶丙子舉人少力學其詩和平冲淡五

言更勝老于校官著有挹翠樓詩草兄震省字健齋亦

以詩名著有意釣山房詩鈔于志

崔德華字蓮舫庠生居邑之徐塔村少讀書硤川丹井僧

房潛心理學私淑張揚園補輯其年譜採錄未刻諸書

多姚陳兩家所未備著有秋聲山館詩鈔

海鹽縣志

崔以學字蒼雨擅長詩古文學有根柢嘗病嘉定錢大昕

疑年錄同邑吳修續疑年錄兩書多遺漏著正續疑年

錄質疑硤川蔣氏為刻桐石山房詩一卷

海鹽縣志

王純字山園邑增生研究經史尤好義舉嘉慶甲戌遇旱

災純率里中籌賑作救荒借箸略二卷已卯復旱請於

平湖令開橫橋堰引泖水灌田作橫橋堰水利紀二卷

晚益肆力詩古文詞著二南訓女解四卷山園吟稿弟

綱字秦望庠生亦敦品力學著有觀鄉記四卷秦望詩

稿

海鹽縣志

吳士旦號託園諸生善繪事風格在石湖誠齋間年八十

餘尤能小楷後目盲乞書為濡毫授之持其手於紙上

量長短闊狹則走筆暝書益飛舞有致

胡昌基橋李詩繫續

楊之清字鐵巖庠生少孤力學吳燈巖徐不瑕咸器重之

與王南浦朱肇楠有三高士之目

同上

周彥曾號美齋諸生精繪事尤工墨蘭善楷法兼草隸六

壬地理亦通曉有鐵珊吟草

兩浙名畫記

王勤字銘庵歲貢生立品端方文富根柢請業者多成名

支清彥任沛霖皆高弟也歿後子孫貧不能讀書兩婿

皆孝廉一周燮字一陳景高今景高子方瀛為刻其遺

稿行世

海鹽縣志

殷瑞梅字納夫輅字敬輿並庠生山子山字四雍世居舟里山陰耕讀相兼庭訓不稍假借瑞梅登賢書選遂昌教諭輅天資敏悟善腹稿父命日薙草以餉羊每命題後輅卽荷蕢往來山麓間及歸則一藝已成伸紙疾書領鄉薦崖岸甚峻屢上春官座師外不謁一人捷南官後或諷以稍通聲氣館選可得也輅謝曰人貴自立得失固有命耳既而廷試下第卒於京師

海鹽縣志

顧履成字蘭似邑諸生世居黃鶴山莊捐棄俗學讀四部書經疑史奧往往發前人所未發中年游京師寓大司

空王引之第見聞益廣手刊逋翁華陽集刻意搜羅補

遺增原刻十之二三著有姓氏源流考

海鹽縣志

崔應樞字秋谷邑增生補學官弟子累試高等生平究心經史子集老而彌篤嘉慶間分纂郡志工詩古文詞著有吾亦廬稿採入

皇清經解中又有詩文集殷水遺聞橫山紀略歲時藻玉廣

孝編廣慈編等書子熙日郡廩生亦有文名

海鹽縣志

胡文蔚字茂栽歲貢生工詩文兼擅書法築小圃讀書其中顏曰穰園學者稱爲穰園先生與吳東發張燕昌輩深相結契嘗建宗祠置田供饗祀並給族之讀書應試

嘉興府志 卷五十一 文苑 三
者著有書屏近語備荒先政穰園詩稿

海鹽縣志

朱葵之字粟珊嘉慶癸酉拔貢戊寅副貢早歲博通載籍

以經術授徒善屬文尤工詩賦自漢魏以下靡不融會

貫通殿撰朱昌頤乃其門人與同登拔萃榜士林傳為

佳話歷任黃巖訓導武康教諭大府薦舉卓異丁父憂

服闋授景甯教諭倡議重建學宮在任七年教士有法

卒於官著妙吉祥室文鈔二卷詩鈔二十二卷詞鈔一

卷雜著一卷

海鹽縣志

方溶字蓉浦世居澉浦歲貢生潛心經學熟悉輿圖所著

禹貢分箋一書攷覈精確又著有澉水新志十二卷授

於潛訓導未之官卒

海鹽縣志

張開福字石匏邑庠生徵士燕昌子好金石之學鑿別鼎

彝碑版能識古文奇字尤工詩客陝西歸自號太華歸

雲叟與二三老友飲酒賦詩無外慕焉

海鹽縣志

陳其泰字琴齋父咸慶學問賅博經史子集以及勾股算

法靡不淹貫嘉慶庚申膺鄉薦任睢甯令酷暑督河工

勞瘁卒於官其泰以廩貢就教職監紫陽書院事道光

己亥領鄉薦歷署雲和長興訓導巡撫劉韻珂延入幕

府值海疆用兵與參謀議頗倚重之事平將列刻章堅

以母老辭著有桐華鳳閣詩文稿鴻雪詞

海鹽縣志

吳世培字棠園道光辛巳副貢由武英殿校錄議敘授福建西河驗掣大使革除陋規調蓮河場大使以年老解組歸與里人朱毓文方溶楊逢南及其兄世堂等為九老登高會每歲重九日一舉白髮婆娑繪園紀事九人迭為賓主粵匪起相繼謝世無一罹兵禍者人以為異

海鹽縣志

楊逢南字子鶴性豪放好吟詩早喪妻不娶子亦卒年八十子然一老吟詠益富有句云病借詩書為藥石老栽花柳作妻孥聞者傷之著有香禪詩草
孫寅亮字月鋤邑廩生暑夜讀書置足甕中以避蚊試輒

冠軍游其門者皆破壁去學士顏宗儀其尤著也業師王慎歿後貧無以葬寅亮首出資並約同門贖金為營

窀穸鄉里義之

海鹽縣志

陳景高字雲山先世由閩之同安遷鹽景高少孤家貧母倪氏教之讀弱冠游郡庠為文援筆立就學使史評奇其才舉道光丁酉拔萃科癸卯登賢書三上春官不第年未四十卒士論惜之著有蕉綠館詩鈔

海鹽縣志

顧德齡字幼梅道光己亥舉人清介絕俗在京遇宴會有歌童輒避席去兄燮綸字磊亭邑庠生著有不秋草堂

詩稿

海鹽縣志

馬玉堂字笏齋道光辛巳副貢性耽書籍杜門讐校未嘗謁官府上元朱緒曾令嘉興時聞玉堂至郡城就訪於書肆劇談竟日人兩賢之著有讀書敏求續記十國春

秋補傳 海鹽縣志

胡敬釗字素園邑增生事母沈氏盡孝生平覃精性理出入儒釋究心高忠憲李二曲湯文正之書所著感應篇述采集諸家埶以已意卒之年作辭世俚言云年過七十不為不老老死曠下俗緣粗了自悔蹉跎過時學道索諸遺經得其頭腦獨認本真真我非渺人之心量極其浩浩私欲紛焉藐然自小損之又損超於物表心地

囂囂性天皦皦世事無端何足計較吾將去之還於大造俚言贈別修道須早有詩稿十餘卷 海鹽縣志

吳鳳前字昔巢道光戊子舉人考取宗學教習乙未大挑用教職甲辰授富陽訓導整頓書院修葺學宮俸滿膺保薦以親老乞養歸里奉母避寇亂母沒哀毀卒 海鹽縣志

徐克熊字耳山恩貢生耄而好學性情恬退著有禹貢註疏儀禮註疏挹秀軒詩稿卻掃山房文集咸豐辛酉縣城陷遇賊被戕年七十有五 海鹽縣志

董世慶字雲軒歲貢生天性孤高皓首窮經心貌皆古出門未嘗不冠帶世人咸以迂闊目之無與議婚者以故

終身不娶年近八旬值粵寇至衣冠端坐被害

海鹽縣志

陸世勳字建堂咸豐戊午舉人自幼苦志讀書遊庠食餼

與同里顏宗儀富世鄭朱慶松徐用儀輩訂文字交先

後皆獲雋世勳一試禮闈報罷回里旋值寇亂避兵鄉

間憂憤填胸惟祈速死同治元年賊至仰藥死

海鹽縣志

朱慶時字輔齋弟慶松字怡齋兄弟友愛閉戶讀書不與

戶外事慶時工詩書通勾股術慶松為文務清高不喜

時尚先後登賢書既再試春官不第同畱都門銳志切

摩卒不遇歸里值寇亂流離抑鬱相繼卒

海鹽縣志

隱逸

齊

顧歡字景怡六歲時父使驅雀田中歡因作黃雀賦不復

顧雀食稻貧無所受業竊聽鄰人讀書悉記不遺傳吳

興邵元之經學開館受徒嘗百餘人母喪水漿不入口

者七日太祖踐阼迎歡稱山谷臣顧歡表曰道德綱也

物勢日也湯武得勢師道則祚延秦項忽道任勢則身

戮願稽古百王斟酌時用則率土之賜臣志盡幽深無

與勞勢請即辭帝賜麈尾素琴有文義三十卷

齊書傳

宋

許棨號梅屋隱居秦溪築小莊於溪北儲書數千卷丹黃不休室中於三楹下分四隔中垂一簾對懸白蘇二像事之植梅屋之四檐著有梅屋稿獻醜集樵談春融小

綴王文祿傳

常詵孫字宜卿同之孫累辟不就所著有天閑雜著櫟齋筆記雲溪藁門人稱雪溪先生趙圖記

常棠字召仲同曾孫值宋季閉關不求聞達篤學善屬文繞庭植竹數十竿以厲操自號竹窗海鹽文獻志

陸能仁宋咸淳進士以兵亂與族父靈龍隱居靈溪今其地有陸高士墓平湖未志

陸正字行正博學篤行兼通律呂象數以家世宋臣矢不仕元侍御臣文海薦之不起後與劉因同徵俱不赴隱居陳山教授其學以慎獨存心為要著有正學編樂律考七經補註袁志參平湖志

元

陸子榮生元至治元年世居海鹽得先儒理學之傳不樂仕進教授生徒所著有樂庵類稿明初嚴講學聚徒之禁徙居當湖鎮隱焉子敬字直齋亦以理學著聞號漸

遠居士平湖朱志

趙友聞字心古宋太宗十三世孫元至大間隱居新倉鎮

學古養高多識好義有聲於時郡邑以提舉薦辭不就

明洪武四年特旌善良給戶帖曰友一平湖程志

明

陳子才五經六藝諸子百家無不通貫尤善丹青不輕為

人下筆元末隱居不仕洪武初下詔以人才徵弗就年

四十歲旦日忽命童子折梅花一枝侍於側自繪其像

形神宛然閣筆端坐而逝兩浙名賢錄

朱朴字元素體耀而修音聲琅琅力穡具餐郡大夫鄭白

泉懇致之以疾辭曰吾氓也焉可與尊官抗禮吾無能

益若治吾休矣有西村集許杞山序而刻之明顏字希

仁與朴交委棄世故存詩七十餘篇海鹽文獻志參袁志

陳鑑字用明性高抗卑舉業日馳駿馬蹴鞠擊劍已復棄

去曰大丈夫不力學何甘伏人下棄勿就閉門讀書數

年學遂成至老口不輟吟咏剡琢性靈金鏗波激無浮

音滯響有勾溪集二卷王文祿傳

張澤民景泰天順間人嘗理小舟具琴書茶竈遇清絕處

橫琴自鼓偶折梅一枝貯瓶內命童子捧之訪天甯

僧童失手碎瓶徐顧曰興已盡矣即返有問月樓時與

李孟濬陸順德輩觴咏其上袁志

董澐字復宗遠祖鎮通經術值元亂隱於海甯泉山澐慄

慨慕義嘗割私產讓兄還友人所質田初攻詩與沈周

孫一元遊放浪山水間聞王陽明講學瓢笠渡江從之

陽明序其事云道人今年已七十往來湖山之間去住

蕭然不知有家室其子穀賢而孝謂道人老矣出輒長

跪請留道人笑曰爾之愛我以姑息我方友天下善士

與古聖賢為徒天地且逆旅奚必一畝之宮而後我舍

即有從吾道人詩稿袁志參靜志居詩話

錢蕭字懋穀讀書賦詩與屠長卿沈嘉則諸人遊王伯稠

胡孺子姚士舜恒經歲主其家待貧交極敬愛宜興俞

安期嘗歲暮乞酒米傾所有予之袁志

陳梁字則梁給事中所學少子少遊學京師與魏大中定

交大中被逮裏糧從之預為經理其後事大中死賅無

所償子學泖且就獄梁為乞貸知交輸納海內誦義故

弁濮陽崇信三歲孤女流落揚州贖歸撫育擇配梁好

讀異書索異解晚歲隱居僧服茹葷治生壙于郭外結

屋三楹覆之語其友曰此毫社遺意也題其柱云此佛

自來耽米汁至今孤冢有梅花浙江通志參靜志居詩話

彭宗礪字君山昭毅將軍紹賢次子母鄭孿生宗礪以產

亡宗礪雖老每生辰素服流涕終身不受子姓之祝兄

宗孟登甲第世爵應及宗礪讓於弟宗周侍父優游山

水間工詩古文詞與胡震亨劉世教相友善以病遂工

岐黃術療疾多奇效年六十五卒私謚節懿先生海鹽縣志

鄭宏字休仲與弟寶字景元友愛子弟有失互加懲責不

為嫌休仲有聲庠序間乙酉後絕意進取棄文字業不

見富貴人雖故人仕宦勿與通鄉居自治蔬圃擔荷灌

漑出遇雨短衣徒跣不以為恥海鹽縣志

祝鏗字鳴字侗儻有智識天啟間魏瑞專政遂棄章句絕

仕進凡知交繫官於朝者為之陳利害明去就勸歸林

壑不累黨錮教子孫以讀書明理忠信篤實為詒謀海鹽縣志

縣志

嚴建字孟侯父大立諸生有善行建力學游庠崇禎己巳

除夕夢庭植大旗上書旌表孝友庚午竟登賢書清操

自勵甲申後隱居不出日以詩文自娛所著有敦倫廣

錄徵行錄北游草海鹽縣志

國朝

吾道行字凝臺宋處士貞白先生衍後裔祖籍開化隱居

胥溪里孝友端方樂善好施訓子一經相傳君揖克承

父志名滿巖序康熙壬子鄉賢海鹽縣志

許稷字召南篤學工詩六丈夫子世其家學次子璵字楚

山醕謹朴茂善琴工畫墨牡丹海鹽縣志

吳天瑞字聖宇性喜琴書山水隨父其昌由新安遷新市

與澈川畢氏有舊契往來間見舟里堰風氣古樸山水

秀逸遂家焉不求聞達以仁厚教子孫

海鹽縣志

范希仁字文若性質古不事舉業工於詩賦詠一市樓積

書數千卷盡出手錄惜無嗣著述散失徐滄浮贈詩所

謂郭西有布衣市隱寄茆廡者也

海鹽縣志

馬世榮字煥如居俯浦里好與方外遊或共乘小舟盪入

太湖中天水相際陳村酒蔬豆吟嘯不輟著俯浦詩鈔

海鹽縣志

張炎字淡玉嘗賣餅平湖之清溪日肩爐釜行吟村落間

得句就村夫子索筆視書之餅為兒童攘竊一空弗顧

也有詠白菊句云老圃月三徑曉霜秋一籬

海鹽縣志

朱石鐘字月江庠生幼好讀史留心經濟深自韜晦隱於

堪輿家占天文多奇中為人相地得乘生氣法喜遊山

春秋佳日半在九十九峰間道光己酉江浙大水作濬

三江議大旨在疏導太湖入泖之路為時所稱

海鹽縣志

藝術

宋

趙孟頫字子貞孟堅弟繼秀安僖王後自號竹所墨竹可觀

周堯敏字禹卿號學山畫竹宗文湖州

王鼎字德新好寫竹學丁子卿深悟筆意子泰之號竹趣

亦能紹父業以上圖繪寶鑑

明

陳景初善繪事與錢塘戴文進同時得名孫鳳尤善白描

海鹽圖經

唐宗祚善傳神景泰間從脫綱征金華賊綱戰歿祚繪像如生一軍見之皆泣吳志

朱端字克正海鹽衛後所人少貧甚業樵漁嘗偕乍浦所人曾和入山端于沙上手畫作山林人物狀遇一異人問曰汝欲作畫耶吾授汝筆和亦乞得之後于正德間並以畫士直仁智殿端授指揮俸賜一樵國書遂號一樵畫宗馬遠山石水口效呂紀浙江通志參九山志

趙麟書工畫正德間直仁智殿授錦衣衛副千戶俸于志

張紀字文正工士女衣摺矮髻與唐伯虎相上下而面龐肉色淺染三停用積粉法三停謂額鼻頰此古法也今

畫家不知矣見只編

陳璣字天器初授業陳景初後游錢塘故家多戴進名跡由此入悟所繪山石雲樹自成一家其寫照則面部鈎染坐法衣紋皆後來所不及浙江通志

王儀字汝儀自稱古鐵生畫法吳偉夏景詩法陶孟字法懷素海鹽圖經

唐愈字子俞號丹泉畫宗郭熙皴法麻皮蟹爪可雜宋元畫髓元詮

韓履祥澈浦人讀書能詩尤精于醫切脈斷人死生隔歲輒中洪武初選為御醫四世孫本亦精其業海鹽文獻志

陸朝世醫其先有名麟者景泰間衛軍征沙寇以醫術療
從行將士有功授醫官子孫世習其業朝尤深于內經
本草切脈洞見病源決死生不爽同時有嚴漢名亞於
朝至今稱良醫者必曰陸紹泉嚴陵坡蓋兩人別號也

浙江通志

張暉中所人能醫治傷寒子翰繼其業感寒疾者藥一服
而愈時號張一帖

姚能字懋良善談論能詩精於醫理著傷寒家秘心法小

兒正蒙藥性辨疑諸書以上海鹽圖經

賀岳字汝瞻初因母病盡購方書誦之且從四方國手遊

遂精其術病者圭勺霑口即奏功所著明醫會要醫經
大旨診脈家寶藥性準繩諸書

王慷者前所人生有神力嘗以指觸穿壁指無傷與人較
藝寺廊脫衣挾柱礎壓之始就搏駕漕艘入都遇劫慷
佯執爨不顧第取一大竹用脇夾破之為薪而劫者盡
斂手去有徒豪倫欲盡其藝俟慷飯持鐵叉刺之慷手
飯甌底當叉鋒即以二筋貫倫鼻其捷如此海鹽縣志

嚴泰字克安善琴操指法取音兼劉徐二家之長後得古
鐵笛乃元楊鐵厓收藏物構齋疊石幽居鳴琴時吹鐵
笛聲應空碧因自號為鐵龍後有張毅亦善鼓琴海鹽縣志

胡日章澈所人少學祿命術遇異人海上授之訣因益精
每作絕句判人一生事無不驗與人言必依於孝友忠
信蓋有道而隱於術者年九十餘卒

以上浙江通志

吳麟振字達生以儒士應試補博士弟子員後棄章句益
肆其力於書常遊金陵董宗伯其昌見其書歎莫能及

于志

國朝

嚴岳字止峯諸生能詩善書寫竹得與可筆意從姪尊字
客子善楷書隸篆工鐵筆兄子訐字學川畫得張遠傳
人物秀逸超妙時稱嚴氏三絕

楊惟聰字海石工畫魚李玥字友璞工花鳥樹石

朱逢吉字谷懷諸生寄蹟蕭寺泊然如浮屠工畫不輕爲
人作墨筆師石田設色近衡山吳同春字凝仲幼卽能
畫不由師習山水花鳥下筆自具幽致弱冠得療疾日
作畫不輟病革呼筆硯倚枕作蘭一本擲筆而逝詩有

復庵草

澈浦詩話

盛賜祿幼遊蘭溪遇方士授岐黃術賣藥城市貧者不責
償捐修瓊城橋佐友人完婚娶年八十五盡以家財分
散親族而卒

許璞字雯來精醫屢著奇效有補輯名醫類案行世

以上海鹽

續圖
經

吳國梅字調五畫宗北苑皴法稠密善用積墨嘗居京師
拂旅壁作畫董文恪邦達見之大加賞異延為上賓

徐視三字元岳家貧學鍼灸濟人兼工詩畫篆刻著有經
脈圖曜本草補遺格物輯略諸書伊志

史天錫陸島顧懷朱誠之楷法師晉唐徐來復與子韞善
摹東坡鄭以甯精行草子溶亦能書李繼祖董國光張

大觀皆工篆隸大觀兼精六法伊志

顏嗣榮工白描人物嚴奎寶善畫猫富灝工花鳥山水著
畫中詩數卷伊志

嚴秉彝字季常庠生精岐黃術為人端方好義有族人思

賣墓木償金保之姪慵字野臣喜吟咏工行草書至老

不倦叔姪並善琴操時號二琴仙壽皆八十餘卒于志

黃謨字啟人諸生著有鄉黨考畧一卷善琴棋晚年工寫

山水宗北苑巨然專事水墨有以設色請者對曰墨中

未嘗無色也兼擅花卉翎毛草蟲明硯田齋筆記

顧禧字紹曾諸生為人瀟灑出塵工書尤善丹青能作尋

丈大幅筆意如其人于志

祝詒燕字翼如幼工詩偶閱人子須知因益取靈素諸書

涉獵之遂精醫理著有治肝三法傷寒易知葉案心法

嘉興府志 卷五十七
等書及翼如詩集

于志

韓芬字正蒼素業儒以母老多病遂改習醫治疾輒瘳且

不責報年六十卒

于志

張慎字謹臣諸生能詩善畫尤工書法有石刻蘭亭樂毅

論十三行臨本行世

于志

繆鵬字南澍拔貢生少不事生產以詩酒自娛工行書筆

意沈着或醉後縱筆更有超然拔俗之致

于志

陳克明字南叔布衣性高潔好吟咏山水士女無不精妙

入京師爲尙書劉文恭器重畱榻十餘年後卒於閩幕

于志

何鏊字君調諸生手纂醫論方書四書題解十二卷

于志

陳敬祓字蘭九工書畫書學趙文敏畫學董米二家俱得

其妙官直隸布政司經歷

于志

俞玫字丙齋弱冠工書畫寸縑尺幅人爭購之著有綠天

樓詩文八卷

于志

吳汝然字晉卿諸生能詩善書寫山水極工綴摹文衡山

仇十洲咄咄逼真

于志

潘友瑾字穆齋太學士工行楷兼擅擘窠大字出入於蘇

米間著有欹枕憶遊草

于志

曾鯨字波臣善寫影雖一幅有數十人者行坐顧盼皆相

淡洽開闢門庭前無古人兼善花鳥

于志

李珣字友樸號樸亭工花鳥樹石從平湖胡湄游鈎勒點染兼得林呂之傳後游吳門摹暉壽平筆意尤工寫生

海鹽縣志

周保光字友光善繪事康熙二十八年十月

聖祖南巡在阜林獻觀湖百老圖三十八年三月恭迎杉青聞

敬繪

聖駕南巡百官朝賀圖進呈蒙

恩疊賜銀兩兼有入京候

旨之命至都門未幾病卒

海鹽縣志

萬育和精青烏子術為人相墓其持論與俗師異謂出忠

臣孝子者為上出文人學士者為中出富貴者為下著

有形家五要補編海昌查慎行為之序

海鹽縣志

許栽字培之國學生精醫辨傷寒分經得仲景遺法每有

患證他人束手治之輒愈著有古今名方摘要歌勞倦

病傷論醫案賞奇痢症述金匱述等書兼工詩有高陽

山人詩稿

海鹽縣志

李脩易字乾齋邑庠生畫得王時敏神髓遊歷京師齊魯

燕趙名山攬勝畫益進黃燮清集諸名士於倚晴樓脩

易亦與唱和

海鹽縣志

張辛字受之少從嘉興張解元廷濟受金石之學鐵筆古

勁道光丁未遊京師時松筠庵住持僧明基創立諫草

堂謀以楊忠愍諫馬市劾嚴嵩兩疏章勒石嵌壁間而

楮墨微毀塗乙混淆見者束手辛鉤刻入神工畢病卒

道州何太史紹基撰傳勒石附嵌廊壁

海鹽縣志

楊方熾字復春國子生工山水人物花鳥性閑靜每風日

晴和窗明几淨染翰不輟晚年精奕子採號樵谷又號

竹虛子諸生山水善皴法能作尋丈大幅筆老氣蒼每

海舶至輒購其畫以去有四知堂詩稿

耕硯田齋筆記

張芳潢字客園自稱養空居士國子生善畫蘭蕙書法歐

褚慕黃老術同時張綸號練峰諸生有神童名善畫

浙

名畫記

張謙字地山號雲槎性格高逸隱於黃冠山水法董巨然

詩筆淡遠

萍踪閒記

劉中理字蟾客山水師董暉用筆蕭然遠俗有山居清嘯

草

耕硯田齋筆記

沈起鯨字庾生官吳縣主簿山水得北苑房山神髓亦兼

二米之妙

耕硯田齋筆記

夏正字時寅善鑒別能書畫友於兄子霽字海潤工畫梅

善篆隸能詩

海鹽圖經

富灝號禮橋山水學梅花菴主花草仿白陽山人能摹十

洲人物

墨香居畫識

陸鳴謙字南村其弟出家乍浦懷橘菴鳴謙寓庵終其身

善畫山水林木古趣盎然歿後人爭購之

乍浦志續纂

陳明賜號雪盃布衣赤貧無立錫地嘗主聞川計芬家善

鐵筆篆籀隸古力追秦漢或臨摹金農陳鴻壽一派無

不神似性疎懶求其墨者必俟奇窘斯援筆立就得潤

資不隔宿罄囊乃止衣敝履穿勿顧也題跋亦簡潔高

古新纂

富生號香吏諸生秉性疎野嘗敝衣跣足登涉山水中歲

匿跡峰泖間好蓄異書精壬遁星運形家言憫人乏嗣

輒為相宅先示方位改作法更宗西術推算星命復測

量日影按吉宿所臨揆時日躔度定牀戶澄思殫慮術

驗乃已遠近神之呼為赤腳仙

倚晴樓詩小序

流寓

漢

施延字君子沛國蘄人少明五經旁通星官風角家貧常任作由奉半路亭食其力以養母人不識也山陰馮敷為吳郡督郵過亭延持帚往敷望而知其賢者下車謝之推食解衣與之錢不受順帝初徵拜侍中位至太尉

謝承後漢書

晉

何準字幼道穆章后父弱冠知名兄充驃騎使仕對曰第五之名何減驃騎後充居宰輔權傾一時而準散帶衡

門不與外事徵拜散騎郎不赴升平初追封金紫光祿
大夫晉興侯子煥以非父志表辭不受準本廬江潯人
寓居於海鹽烏夜村有其墓

海鹽
徐志

宋

趙善禮字敬叔太宗八世孫父不瑄監嘉興海鹽稅善禮
隨侍遂寓居焉仕爲承信郎增秩承節郎有古儒風

海鹽

仇志

陸啟禎象山先生裔宋末任海上巡司寓海鹽之當湖鎮
元旣滅宋江南大亂道梗不能歸遂家焉子二聞韶聞
章傳八世綸九世琳十世山鼈皆有名稱至十一世萬

垓舉隆慶進士仕福甯知州啟禎墓在當湖鎮宣德五
年分平湖縣建縣治墓遷於縣之西北隅垓居仍宋末

遺址陸山撰傳

海鹽
徐志

董健汴人仕至武功大夫扈從南渡家於海鹽之澉浦其
後曰仲真者遷海甯之錢山澉浦世隸軍籍其子源當
往戍弟灃請代之遂復家海鹽

于志

常同字子正臨邛人御史安民之子也登政和進士第首
論朋黨之禍及補禁旅事除殿中侍御史諫罷呂頤浩
再相劾張浚喪師失地與辛炳在臺同好惡上皆重之
秦檜與金講和同持守備之說忤檜意乞郡知湖州頌

賢明屢空無家寄居邑西郊天甯僧舍十年自號虛閒居士卒贈少師諡忠毅二子秣衿皆典郡有聲

海鹽縣志

元

李衍字仲賓汴人大德中舉賢良方正授嘉興路總管府同知時勢豪多涸湖為田民病旱勞衍請設濶西都監營田司剷去湖壩諸田陞平江路水軍都督萬戶府副都萬戶嗣見元政日非隱居海鹽之苞溪歿即葬焉子

孫占籍多聞人

伊志

何鏞字聲之父基宋理學名儒鏞於元大德間遷居海鹽鳳凰山麓世業耕讀至正壬午劉誠意題其孫貴四之

堂額曰遺安

伊志

王濟宣威將軍前南甯州安撫使寓居澈川至元丁丑澈鎮招討王瑑假軍權決壞永安湖為田民業多槁濟聞之朝廷命行省親勘還濟為湖澈民德之

海鹽圖經

姚桐壽字樂年桐廬人博學多才識元末為餘干教授與僚友海鹽人沈穀善結姻盟穀死桐壽攜子就婚值世

亂因寓居嘗撰樂郊私語一卷

海鹽圖經

徐樞字叔拱其先宋濮陽太守熙遇異人授以扁鵲神鏡經遂以醫名世父號神翁元海鹽州醫學教授樞少傳其術兼學詩於楊維禎洪武乙亥薦為秦府良醫後召

為太醫院御醫有足庵集行世華亭志

陸德方字顯叔華亭人至正壬午登賢書授般陽路學正

未幾羣雄蜂起挂冠歸時元平章河南沈炤避亂鹽之

甘泉鄉德方備書其家與談今古知素績學遂妻以女

洪武初以通臣薦不赴梅園楊氏並其後人海鹽縣志

朱順字文禧婺源人元貞間任嘉興路主簿卒於官子孫

遂家海鹽之間琴橋側族姓繁衍魏科相繼于志

明

劉儼字敬先其先汴人父廣文君貞宦海鹽名籍早歲遊

庠厭場屋遂棄不事友人沈德常死無所歸鬻田葬之

娶妻雙瞽終身愛敬如賓嘗以澉之水利謁張給事甯

條陳詳切詩豪邁不以刻鏤為工董雲撰傳

李大才字怡春蘭溪人薄遊海上遂與彭紹賢沈孝徵諸

公交因家海鹽工岐黃術厚施不責報市大火鄰居三

面皆燼大才屋獨無恙人謂厚德之報

范明望字拙庵錢塘人少為諸生投筆中武科鄉會試歷

任至甯紹參將乙酉攜家隱居海鹽僻園談及世事慷

慨多大計晚年托蹟僧寮以上袁志

陳時字九若餘姚人遊學至海鹽遂寓不歸嗜古金石刻

書學顏柳筆意遒勁北兵入見其書帙盈兩袖笑為腐

儒釋不殺時拍其肩大呼曰上天好生兵怒遂遇害詩

文有藥塢集

海鹽續圖經
參橋李詩繫

邱上儀字維正武準人武進士歷官南贛總兵見時事不可爲謝病不仕軍民感其恩立石衛署門外曰天下第一清廉真正好官參府邱公去思碑鼎革後隱居海鹽

邵灣山卒

袁志

許相卿字台仲本海甯靈泉里人以鹽邑紫雲村山水爲勝卜居村南茶磨山遂占籍焉正德中舉孝廉從陽明子講學又與關中孫一元吳下文徵明詩筒往來後登進士授兵科給事中嘗上疏論罪闕張銳張忠內降貫

死非法張欽義子襲緹騎秩爲濫恩著敢諫聲在廷張璉桂萼夏言並契交性慕棲逸僅三載引疾歸舊遊仕者勸之出故以農圃桑麻攬其談爲索京師故人書曰有詢我者君第言厭世去矣夏言之再出也過郡城就商進止相卿不答第曰吾惜李長源受觀察判官耳素持介節官諫院時無方帕之納垂老入山海昌令樹表邑城中往謝則五鼓伺關入向縣門再拜徑去倭入紫雲村趨避傷足家於舟鹽令鄭茂致書邀入城亦不就蓋超然塵壒外焉所著有革朝志貽謀四則及文集十二卷子御史聞造另有傳

海鹽縣志

查志文字鳴周海甯人守廬郡無為州晉秩本郡丞買山海鹽之古杏為園且為墓葬焉志文佩丞印司江防江行風覆舟板舷流數十里不沒印亦宛在廬人傳以為

異海鹽縣志

吳孺子字少君別號元鐵蘭溪人工詩性孤僻好採壽藤瘦株曲瓢為几杖槃盂樽壺疊洗之屬摩挲光澤客稍諦視輒噴為俗塵所觸王弇州為作破瓢歌寓鹽邑天甯禪房及錢懋穀家最久各有詩海鹽縣志

金九成字伯韶幼警敏善屬文九歲題詩郡齋為郡守龔勉所器重萬曆丙子舉於鄉隱武原之望虞山著史論

史辨各三十卷又別為元史考誤四十卷詩有懷春小

草借竹軒稿望虞山人全集子壽明亦有名著麗情雜

錄雲堂初稿續稿海鹽縣志

祝以真字佑徵世為龍山望族嘉靖間遊南雍中萬曆戊

午應天舉人天啟間就教嵩縣陞南豐令裁馬戶抑勢

豪考滿歸卜築邵灣山倡明理學乙酉聞南都亡痛哭

不食卒海鹽縣志

吳普誠前明隱士遨遊海上無識普誠者其泛舟詩云扁

艇泛湖津葛天上世民忘機人莫識鷗鳥偏相親事詳

芸牕雜錄海鹽縣志

吳文冕字從周休甯人杭府庠生遷澈川與吳麟瑞昆季
 稱莫逆以文章節義相尚甲申後遂杜門不出日事著
 述有四書不夜篇二十卷周易燃犀五卷兼畱心堪輿
 岐黃脩養之術著三才滙璧四卷醫學指南十卷元科
 秘要四卷經驗良方十二卷幼幼心法二卷元脩最上
 乘二卷皆手自鈔錄晚年自號白岳逸民真如子

海鹽縣志

國朝

黃谷字松石原名袍字形雲雲南世襲百戶蘭烏之亂以
 策干巡按朱泰禎奇之畱幕下後攜至海鹽遂不歸其
 子萬里迎之不顧善畫人物人以絹素乞畫不輕落筆

醉以斗酒輒揮翰如風雨門人張遠定海人初從曾鯨
 學寫真無不逼肖筆意遠出沈韶謝彬上從谷家海鹽
 谷依遠以歿遠子德師畫亦工

巴有楨號福之族著休甯遊浙西至武原家焉子應奎康
 熙副車授守備隨征八閩恢復漳泉等郡邑加都司父
 子合葬澈浦茶磨山側小山

以上海鹽續圖經

楊斌字乘六海甯人寄籍海鹽少孤至性過人事母吳備
 極孝養乙酉被兵邑人空城走吳老病不能行兵至將
 加刃斌號呼請死願舍母兵感其孝俱獲免讀書博識
 為文操筆立就以忠孝大節教子雍建卒祀海甯鄉賢

袁志

王宏字大宜達州人父琮天啟進士任汝甯司理後晉湖廣中丞值寇難殉節崇祀忠烈大宜遭父變遊浙僑寓武原康熙壬子回籍中式

畢蕃昌字子茲父佩由歙遷海鹽時濬澈川新河中壩毅然其事激民德之與創開新河俞騰蛟並祀壩旁

吳保和字子忠由蕭山遷海鹽時百步橋糜蕩廟橋皆圯行者病焉保和獨任修築里人感德更名百步亭為福田庵

以上海鹽續圖經

董潮字曉滄常州人贅壻海鹽陳氏入浙闡中式人都以

紅豆詩得名京師號紅豆詩人癸未成進士授庶常著

有東亭集

伊志

倪為穀字龍田海甯廩生寄居海鹽擅著述工書畫著有五經句讀音義考生庵讀史錄唐宋詩摘錦

于志

金澗字具瞻太學生海甯人業醫尤精幼科以醫來鹽遂家焉性慈恕未嘗以責報怠視貧家兒遇危證輒終夜不寐家人竊聽之但聞緝書聲以是治得十全年六十九卒著有本草分劑

于志

許光祚字靈長關西人工八法宗褚河南筆意其小楷尤精寓海鹽真蹟流傳人咸寶之

于志

李玉如字能白錢塘廩生寓居武原與其徒馬駿讀書資聖寺之半竹閣合刻僧廬集其抱瑟草堂詩集採入輜

軒續錄于志

胥庭字道生江西南昌人兄以穀官嘉巡道身後貧無歸

庭遂家海上買地種蔬環堵不蔽風雨晚斷肉食持居

士服先知死期以遺稿屬故人張給諫曰自怡集海鹽縣志

胡山字海岳蘭谿人明諸生鼎革後棄家去陽羨遷硤石


繼又寓居海鹽賣藥自給得錢輒買酒吟詩有寓廬草

海鹽縣志

張敏行字其言本籍吳門以醫術行於鹽兼善風鑑命理

建香隱庵以居沒卽葬焉

海鹽縣志



嘉興府志卷五十七

嘉興府志

卷五十七

海鹽流寓

七

